

# MAK Yesu Kilisi xolac wê Mak kivuu ge

*Jon Lipacên nêl Yesu kitong*

*(Matyu 3:1-12; Luk 3:1-9,15-17; Jon 1:19-28)*

<sup>1</sup> Kiyang tiga, xolac nivaha wê nêl Yesu Kilisi wê Anutu nu ge kitong.

<sup>2</sup> Xolac tiga, plopet Aisaia nêl kitong mugên ilage, om Anutu vya wê Aisaia kivuu ge yêp bêga nêbê,

“Ngô lê. A ob vông xomxo ti i kô a kiyang mi loc mug ông nêl môm, ên i viac môm wê ông obêc mila vac ge. <sup>3</sup> Om xomxo tige obêc tyuc vya vac vigwe mahigun pileva bêga nêbê, ‘Xam viac Apumtau môm wê ob lam vac ge di vông i môm i yêp bôbac.’ ”

<sup>4</sup> Kiyang nêl bêge, mêgem Jon Lipacên la vac vigwe mahigun pileva di la nêl xolac vô xomxo ên nêbê he i pilepac he di lipac mia êdêc Anutu i kitya he nêl nipaên vêl. <sup>5</sup> Om xomxo Jêlusalem hixôn xomxo vac vigwe levac Judia vihati la vô Jon di nêl he nêl nipaên kitong vô i, om he la le vac mia Jodan di Jon lipac he.

<sup>6</sup> Jon vinyum ngakwi wê he duu bwoc kamel niviluhu ge di vêx let wê bwoc ninivi ge, di yaên wê mi ya ge, hiveac hixôn vinoluc. <sup>7</sup> Mêd Jon nêl xolac vô

xomxo bêga ên nêbê, “Xomxo ti obêc val timuên, lêc xêkizêc wê i vông ge luu xêkizêc wê a vông ge vêl, di a o nigviha tiyi wê a ob piwelac

yihi vêl ên su wê i vông ge lêm. <sup>8</sup> A ga, a lipac xam ya mia pileva, léc xomxo tige obêc lipac xam ya Myakilôhô Ngibua.”

*Jon lipac Yesu*

*(Matyu 3:13-17; Luk 3:21-22)*

<sup>9</sup> Vô buc tige Yesu sea ben Nasalet wê yêp vac vigwe levac Galili ge di la vô Jon Lipacên di Jon lipac i vac mia Jodan. <sup>10</sup> Lipac i pyap di Yesu lec mi lôm kehe, léc lutibed Yesu yê wê lag puunê tax di Myakilôhô Ngibua tu tucluu manôn di lam yêp lec i kisii. <sup>11</sup> Mêd vya ti lam hixôn gê lag puunê ên nêbê, “Ông a nug wê a xêgyaa vin lec ông di a xê ông nivaha ge.”

*Seten yaxên Yesu*

*(Matyu 4:1-11; Luk 4:1-13)*

<sup>12</sup> Mêd lutibed Myakilôhô Ngibua vông Yesu la vac vigwe mahigun pileva wê xomxo ti dô vacên ma ge, <sup>13</sup> di Yesu la dô tiyi xocbê buc kehe yuu di Seten yaxên i. Vigwe tige, bwoc mavihô dô hixôn, léc angela lam viac Yesu.

*Yesu nêl xolac taxlee gê Galili*

*(Matyu 4:12-17; Luk 4:14-15)*

<sup>14</sup> Tibii tung Jon Lipacên la dô vac xumac kalabuhu, pyap dêc Yesu la vac vigwe levac Galili di la nêl Anutu xolac vô xomxo ên nêbê, <sup>15</sup> “Gwêbaga buc wê Anutu nêl ge ob vô nôl lec, di vigwe kisiinê nu vô kwabo lec. Om xam pilepac xam di vông i vin xolac.”

*Yesu tyuc xomxo yuudiyuu la vô i*

*(Matyu 4:18-22; Luk 5:1-11)*

<sup>16</sup> Yesu mîla vô mia luaên Galili nînya lêc yê wê Saimon yuu li Andlu nêx leac vac mia luaên tige nêb ob hi pis, ên yuu ge, yuu mi vông yuac mone lec pis hiên. <sup>17</sup> Om Yesu nêl vô yuu ên nêbê, “Muu lam timu vô a vixag, ên a ob vông muu didii xomxo mi lam vô a i tiyi xocbê muu didii pis vac leac ge.” <sup>18</sup> Om lutibed yuu sea leac dô xel di la hixôn Yesu.

<sup>19</sup> Mêd yon sea vigwe ge di la teva tya, lêc mîla yê Sebedi nu yuu, Jems yuu Jon wê yuu dô lec dipac di duu yuu leac wê tip sea ge xôn. <sup>20</sup> Mêd Yesu keac yuu lam om yuu sea ma Sebedi hixôn nue yuac he dô lec dipac di yuu la hixôn Yesu.

*Yesu tii vimwo nipaên vêl ên xomxo ti  
(Luk 4:31-37)*

<sup>21</sup> He la dô vac vigwe Kapaneam, dêc buc wê sabat ge od Yesu la vac he xumac lilo di la nêl xolac vô xomxo. <sup>22</sup> Mêd xomxo tige yetac ên kiyang wê Yesu nêl vô he ge, ên Yesu o tixuu he tiyi xocbê xomxo wê xovô Moses xolac ge lêm. Nge, Yesu nêl kiyang hixôn xêkizêc.

<sup>23</sup> Xomxo ti wê vimwo nipaên dô vac nilô ge dô hixôn he vac xumac lilo tige, om keac vya levac ên nêbê, <sup>24</sup> “Yesu Nasalet, ông lam ên ông nêb ông ob vông bêna vô xe? Ông nêb ông ob kitya xe vêl, me? A xovô ông ên a nêbê ông ge xomxo ngibua wê Anutu vông ông lam ge.” <sup>25</sup> Lêc Yesu nêl kiyang xêkizêc la vô i ên nêbê, “Keacên i ma, di lam loc vêl ên xomxo tige.” <sup>26</sup> Mêgem vimwo nipaên tige vô kitiv kitiv xomxo tige di tyuc vya levac di sea i di la. <sup>27</sup> Mêd xomxo wê dô mi yê gee yetac mabu di nêl voma ên nêbê, “Xomxo

tige va nêl kiyang bêna? Tige kiyang paha ti. Ên i nêl kiyang hixôn xêkizêc vô vimwo nipaên tiyi xochê xomxo levac ge, om vimwo nipaên ngô i vya di vông i tiyi wê nêl ge.” <sup>28</sup> Di lutibed xomxo nêl Yesu lê vô levac vac vigwe Galili vihati.

*Yesu vông Saimon Pita yen vêxta vô nivîha lec  
(Matyu 8:14-15; Luk 4:38-39)*

<sup>29</sup> He sea xumac lilo di lop mi la vixun, di Jems yuu Jon, yuu la hixôn di he xôn la vac Saimon yuu Andlu ben. <sup>30</sup> Lêc Saimon yen vêxta vông yidac ngwax tum mi diyêp lec pêt, om he nêl kitong vô Yesu. <sup>31</sup> Om Yesu la le kwabo vô i di hêm lec i vigê di vông i le kisii, di yidac tige tip la di i vô nivîha lec, mêd la myêl yaên mi vet he ya.

*Yesu vông xomxo yidac tibeac vô nivîha lec  
(Matyu 8:16-17; Luk 4:40-41)*

<sup>32</sup> Hiyôv hoo la di vigwe ob buc mêd xomxo tibeac kô xomxo yidac hixôn xomxo wê vimwo nipaên dô vac he gee mi la vô Yesu. <sup>33</sup> Om xomxo vihati wê dô vac vigwe tige la kitucma mi le kwabo vô xumac tige vuayen. <sup>34</sup> Mêd Yesu vông xomxo wê tulec yidac toto gee tibeac vô nivîha lec di tii vimwo nipaên vêl ên xomxo tibeac. Lêc vimwo nipaên xovô Yesu om Yesu vibu he nêb he i o lêc nêl i kitong vô xomxo lêm.

*Yesu vông yuac mi vilee vac vigwe Galili  
(Luk 4:42-44)*

<sup>35</sup> Vô pitoc yang Yesu kidi lec di sea vigwe tige di la vac vigwe mahigun pileva wê xomxo dô vacên ma ge, di la kitaa. <sup>36</sup> Lêc Saimon he lie

myag i la, <sup>37</sup> dêc mila yêvô om nêl vô i ên nêbê, “Xomxo tibeac dimyag ông.” <sup>38</sup> Lêc Yesu nêl vô he ên nêbê, “Maê. Il ob la vac vîgwe yaya wê yêp kwabo ge ên a nêl xolac vô he hixôn. Ên yuac ga wê a lam ên a nêb a ob vông ge.” <sup>39</sup> Mêgem Yesu la vîgwe Galili vihati ði la nêl xolac vac Yuda xumac lilo toto ge ði tii vimwo nipaên vêl ên xomxo.

*Yesu vông xomxo wê kityax mahizihizi ge ti vô nivîha lec*  
(Matyu 8:1-4; Luk 5:12-16)

<sup>40</sup> Xomxo wê kityax mahizihizi ge ti la yev vîxa kitu vô Yesu ði kitaa i ên nêbê, “Ông obêc nêb a vô nigvîha lec ge od ông tiyi wê ông ob vông a nignîvi i vô nivîha lec.” <sup>41</sup> Mêdêc Yesu xo vîgwe pisiv ên i om vyax vîgê lec ði nêl vô ên nêbê, “A nêb ông vô nimvîha lec.” <sup>42</sup> Yesu nêl ði yidac tige tip la lutibed ði i ninîvi vô nivîha lec. <sup>43</sup> Mêd Yesu nêl kiyang xêkizêc vô i ên nêbê, “Ông kidi lec mi loc, <sup>44</sup> ði ông o lêc nêl nimnîvi wê vô nivîha lec ge kitong vô xomxo ti lêm. ði ông loc hîlung nimnîvi mô vô xomxo wê mi si daa vô Anutu ge ði vông daa i tiyi môp wê Moses xolac nêl ge, ên xomxo vihati i yê ði xovô bê ông nimnîvi vô nivîha lec om ông vông daa.” <sup>45</sup> Yesu nêl bêge lê, lêc xomxo tige la nêl kiyang kitong vac vîgwe vîyang vîyang, mêgem Yesu o tiyi wê ob la hîlung i seac vac vîgwe levac tiyi xocbê ilage lêm, om la dô vac vîgwe mahîgun pîleva, lêc xomxo vac vîgwe vîyang vîyang ge kituc la vô i.

## 2

*Yesu vông xomxo ti wê vixa vô xêlehe ge vô nivihha lec*

*(Matyu 9:1-8; Luk 5:17-26)*

<sup>1</sup> Buc mangwe la vêl lêc Yesu lax mi la ben Kapaneam, di xomxo ngô wê i lax dô vac ben ge, <sup>2</sup> om xomxo tibeac la pup lec i ben di le vac vuayen hixôn, om môp ti o yêp lêm. Mêd Yesu nêl xolac vô he, <sup>3</sup> lêc xomxo yuudiyuu ken li ti wê len vô xêlehe ge mi lam, ên nêb ob kô i mi la vô Yesu. <sup>4</sup> Lêc xomxo pup lec vigwe om môp ti o yêp wê he ob kô i mi la vô Yesu ge lêm, om he lec xumac mi la kisii mi la dii xumac mya ti wê Yesu le ge vêl di vông

xomxo tyo lop mi la hixôn pêt di la yêp vô Yesu manôn. <sup>5</sup> Mêd Yesu yê wê he vông i vin ge om nêl vô xomxo tyo ên nêbê, “Nug, a kitya ông nêb nipaên vêl pyap.”

<sup>6</sup> Mêlêc xomxo wê xovô Moses xolac gee ya dô hixôn om ngô kiyang wê Yesu nêl ge di xo vac nilô bêga nêbê, <sup>7</sup> “Bêna lêc xomxo tige nêl kiyang tibêge? Ge so vya vô Anutu, ên xomxo ti o tiyi wê ob kitya xomxo nêb nipaên vêl ge lêm. Nge, Anutu vaci tived tiyi wê ob kitya xomxo nêb nipaên vêl.” <sup>8</sup> Lêc Yesu xovô kiyang wê he xo vac nilô ge, om nêl vô he ên nêbê, “Bêna lêc xam xo kiyang tibêge vac nilômê? <sup>9</sup> Xam ngô lê. Kiyang tina wê obêc vô viyin maên ge? Kiyang wê nêbê, ‘A kitya ông nêb nipaên vêl’ ge, me kiyang wê nêbê, ‘Ông kidi lec di kô ông pêt lec di loc’? <sup>10</sup> Mêlêc a nêb a ob vông xovôên vô xam bê a, Xomxo Nu, a xêkizêc tiyi wê a ob kitya xomxo

nên nipaên vêl gê kibun ga, om xam wê.” Om Yesu nêl vô xomxo ti wê len vô xêlehe ge ên nêbê, <sup>11</sup> “A nêl vô ông bê ông kidi lec di hôm ông guhu lec di lôc bom.” <sup>12</sup> Di lutibed xomxo tige kidi lec vac he mahigun di hôm i guhu lec di loc mi la. Mêgem xomxo gee vihati yê di yetac mabu di pîmîl Anutu di nêl ên nêbê, “Xe o xê susu bêga ti ila lêm.”

*Yesu keac Livai la hixôn i  
(Matyu 9:9-13; Luk 5:27-32)*

<sup>13</sup> Yesu lax mi la mia luaên Galili tii vac mêd xomxo tibeac la vô i, di i nêl xolac vô he. <sup>14</sup> Pyap di Yesu loc mi la lêc mîla yê Livai wê Alpias nu ge, wê xeedô vac xumac wê he mi kô mone takis vô tibii vac ge, om Yesu la nêl vô i ên nêbê, “Lam timu vô a vixag.” Mêgem Livai kidi lec di la hixôn Yesu mi yuu la.

<sup>15</sup> Mêd Yesu hixôn i nue ngivihi la ya hixôn Livai vac i ben, lêc tibii wê mi kô mone takis ge hixôn xomxo nipaên, he tibeac la ya hixôn he, ên xomxo tibêgee tibeac mi timu vô Yesu. <sup>16</sup> Lêc Palisi wê xovô Moses xolac ge he ya yê wê Yesu diya hixôn tibii nipaên yuu tibii wê mi kô takis gee, om nêl vô Yesu nue ngivihi ên nêbê, “Bêna lêc Yesu la ya hixôn tibii wê mi kô mone takis ge hixôn tibii nipaênê?” <sup>17</sup> Mêd Yesu ngô wê he nêl ge, om nêl vô he ên nêbê, “Xomxo nivîha obêc la vô docta lêm. Nge, tibii yidac ge wê obêc la vô docta. Om xam xovô bêga bê a o lam ên xomxo nivîha lêm. Nge, a lam ên tibii nipaên, ên a nêb a ob tyuc he lam vô a.”

*Kiyang lec môp wê xomxo ngibua yaên ge  
(Matyu 9:14-17; Luk 5:33-39)*

<sup>18</sup> Buc ti Jon Lipacên nue ngivihî hixôn Palisi he ngibua yaên tiyi môp wê he Yuda mi vông ge, om xomxo mangwe la nêl vô Yesu ên nêbê, “Jon Lipacên nue ngivihî hixôn Palisi ge, he mi ngibua yaên, lêc bêna lêc nume ngivihî o ngibua yaên lêmê?” <sup>19</sup> Lêc Yesu nêl vô he ên nêbê, “Tibii viyang ti lie ti obêc ii vêx ti lêc gên dô hixôn he ge od he obêc ngibua yaên, me? Ma vêl. Ên li tige gên dô hixôn he, om he ob dô hixôn xêyaa nivîha di ob ngibua yaên lêm. <sup>20</sup> Lêc obêc buc timuên wê tibii ob kô li tige vêl ên he ge od ge wê he ob ngibua yaên.”

*Kiyang pilepacên lec môp tikwê hixôn môp paha*

<sup>21</sup> Yesu nêl ên nêbê, “Xomxo ti nên ngakwi obêc tip ge od obêc kiping ngakwi paha myahîpu ti vêl mi la duu lec tikwê lêm. Ên obêc vông bêge ge od myahîpu paha tige obêc titê tikwê lêx di tocên obêc vô levac. <sup>22</sup> Di xomxo ti obêc too wain paha vac bwoc ninivi tikwê lêm. Ên obêc too vac ge od wain obêc vuac di tax ninivi tikwê tip di wain too la. Om wain paha ge, xomxo i too vac bwoc ninivi paha.”

*Yesu nêl kiyang lec môp wê vibuên yuac lec sabat ge*

*(Matyu 12:1-8; Luk 6:1-5)*

<sup>23</sup> Vô buc sabat ti Yesu he nue ngivihî la vô môp wê la vac yuac yaên ge ti, mêd he mila lê, lêc nue ngivihî le yul wit nôn wê tiyi xochê pidi nôn ge



di ya. <sup>24</sup> Lêc Palisi ya yê di nêl vô Yesu ên nêbê, “Wê lê, gwêbaga buc sabat wê Moses xolac vîbu nêb il ob vông yuac ti lec lêm ge, lêc bêna lêc nume ngîvihi vông yuac lec?”

<sup>25</sup> Lêc Yesu nêl vô he ên nêbê, “Môp wê bug Devit vông ilage, xam kitong, me xam lungên? Môp bêga nêbê Devit he lie dô, lêc vip den he.

<sup>26</sup> Vô buc tige Abiata tu xomxo daa siên nêb levac mi dô vac Anutu xumac ngîbua, om Devit la vac xumac ngîbua tige di la hêm blet ti wê he tung vô Anutu manôn ge. Blet tige xomxo pîleva o tiyi wê ob ya ge lêm. Nge, xomxo wê mi si daa vô Anutu gee, heche va ob ya. Lêc Devit kô mi lax ya dêc vông mi lie ya hixôn. Lêc Devit môp ge tiyi, ên Abiata vaci vông vô Devit mi i ya.”

<sup>27</sup> Om Yesu nêl vô he ên nêbê, “Om xam xovô bê xe êno o vông i so lêm, ên Anutu o tung xomxo ên nêb he i ngîdu buc sabat xôn lêm. Nge, vông buc sabat ên nêb i ngîdu xomxo xôn. <sup>28</sup> Om a, Xomxo Nu, a tu buc sabat kehe hixôn.”

### 3

*Yesu vông xomxo wê vigê vô nîpâên ge ti vô nivîha lec vô buc sabat  
(Matyu 12:9-14; Luk 6:6-11)*

<sup>1</sup> Yesu la vac Yuda xumac lilo lu ngwe tii vac, lêc xomxo wê vigê vîlu vô xêlehe ge ti dô hixôn he vac xumac tige. <sup>2</sup> Di xomxo wê xeedô gee yê Yesu xôn ên nêb ob yê bêc Yesu obêc vông xomxo tige vô nivîha lec vô sabat ge, od he ob vông kot vô Yesu. <sup>3</sup> Mêd Yesu nêl vô xomxo vigê nîpâên tige ên nêbê, “Kidi lec mi le vac

mahigun.” <sup>4</sup> Om Yesu nêl vô he vihati ên nêbê, “Xolac wê il Yuda vông ge, nêb il vông bêna lec sabatê? Nêb il vông nivuha, me nêb il vông nipaên? Il ob vông xomxo vô nivuha lec, me il ob hi he i yib lec sabat?” Lêc he dô kiyang maên di o nêl kiyang ti lax vô Yesu lêm. <sup>5</sup> Om Yesu yê he vihati manôn di xêyaa vô myavinê vô he, di nilô vô vinyin ên wê he nilô xêkizêc ta di he o vông i vin lêm ge, om nêl vô xomxo vigê nipaên tige ên nêbê, “Titô vigêm.” Mêgem xomxo tyo titô vigê lêc vigê vô nivuha lec. <sup>6</sup> Mêd lutibed he Palisi kidi mi la, di la kitucma hixôn Helot nue di he xôn myag môp wê nêb ob hi Yesu i yib lec ge.

*Xomxo tibeac la vô Yesu vac mia luaên Galili*

<sup>7</sup> Yesu he nue ngivihî loc mi la mia luaên Galili di xomxo tibeac timu vô Yesu vixa. <sup>8</sup> Xomxo tigeê lam gê vigwe Galili yuu Judia, di lam gê Jelusalem, di lam gê Idumia, di lam gê mia Jodan vilu ganê di lam gê vigwe Taia yuu Saidon, ên he ngô yuac wê Yesu vông ge om nêb ob lam ên lam yê. <sup>9</sup> Om Yesu nêl vô nue ngivihî ên nêbê, “Xomxo tibeac hiwocên val dô om obêc hivun a xôn, om xam loc viac dipac ti, êdêc a sox la dô lec.” <sup>10</sup> Yesu nêl bêge, ên vông xomxo yidac tibeac vô nivuha lec, om he wê yidac ge le i vivac i ên nêb he ob vyax vigê lec i ên he i vô nivuha lec. <sup>11</sup> Di vimwo nipaên wê dô vac xomxo ge yê Yesu om yev vixa kitu vô di tyuc vya levac ên nêbê, “Ông ge Anutu nu.” <sup>12</sup> Lêc Yesu vîbu he nêb he i o lêc nêl i kitong vô xomxo lêm.

*Yesu vînoo nue ngivihî vigê yuu di tô mi la yuu (Matyu 10:1-4; Luk 6:12-16)*

<sup>13</sup> Yesu la lec kitôn ti, mêd keac xomxo ya nêb he i loc vô i. Om he la vô i, <sup>14</sup> di Yesu vinoo he vigê yuu di tô mi la yuu ên nêb he i dô hixôn i, dec obêc vông he la nêl xolac, <sup>15</sup> di ob vông xêkizêc vô he i tiyi wê he ob tii vimwo nipaên vêl ên xomxo ge. <sup>16</sup> Om he lê bêga, Saimon, wê Yesu nêl i lê ngwe nêbê Pita, <sup>17</sup> di Jems yuu Jon wê yuu ma Sebedi ge lêc Yesu nêl yuu xôn lê ngwe bêga nêbê Boanesis. Lê tige kehe bêga nêbê deac tugên, ên yuu ge wê mi higac vô xomxo ge, <sup>18</sup> di Andlu yuu Pilip di Batolomyu, di Matyu yuu Tomas, di Jems wê ma Alpias ge, di Tadias yuu Saimon Selot, <sup>19</sup> di Judas Iskaliot wê obêc hîlung Yesu vô tibii vevac timuên ge.

*Xomxo nêl nêbê Yesu vông yuac ya xêkizêc wê Seten vông ge*

*(Matyu 12:24-32; Luk 11:14-23; Luk 12:10)*

<sup>20</sup> Yesu lax mi la vac ben xumac lôma, mêd xomxo tibeac la kitucma hixôn i om hiyôv manôn wê Yesu he nue ngivihi ob ya yaên lec ge ma. <sup>21</sup> Mêd Yesu lie ngô kiyang tige om val ên nêb ob lam kô Yesu, ên xomxo ya nêl ên nêbê Yesu vô mavmav.

<sup>22</sup> Di xomxo wê xovô Moses xolac ge wê he lam gê Jelusalem ge, he nêl ên nêbê, “Bielsebul wê tu vimwo nipaên nêl levac ge dô vac Yesu nilô, om Yesu tii vimwo nipaên vêl ên xomxo ya xêkizêc wê Bielsebul vông ge.” <sup>23</sup> Om Yesu keac xomxo vihati val kwabo vô i di i nêl kiyang pilepacên ya vô he bêga nêbê, “Bêna lêc Seten ob tii Seten vaci vêl? <sup>24</sup> Xomxo viyang ti obêc hibuma la yuu di vông vevac voma ge od he ob dô nivîha lêm.

<sup>25</sup> Di xomxo wê xumac tived ge obêc hibuma la yuu di vông vevac voma ge od he obêc dô nivihala. Nge, xêkizêc wê he vông ge ob tô mi la.

<sup>26</sup> Om kiyang wê xam nêl ge obêc kiyang nôn ge od obêc tiyi xocbê Seten vaci vông vevac vô Seten di hibuma sea, lêc obêc bêge ge od xêkizêc wê Seten vông ge obêc tip vac.

<sup>27</sup> “Xomxo xêkizêc ti obêc dô vac i ben xumac loma ge od xomxo ti o tiyi wê ob la vun i susu ge lêm. Lêc obêc ku xomxo tige xôn pilihi ya yihi ge od tiyi wê tibii ob la vac i ben xumac loma di la vun i nêl susu vihati ge.

<sup>28</sup> “A nêl hixôn nôn vô xam bê xomxo ti obêc vông môp nipaên, me obêc nêl kiyang nipaên ge od Anutu tiyi wê ob kitya nipaên tige vêl ge. <sup>29</sup> Lêc xomxo ti obêc nêl kiyang nipaên lec Myakilôhông Ngibua ge od o tiyi wê Anutu ob kitya i nêl nipaên tige vêl ge lêm. Nge, nipaên tige ob yêp vô xomxo tige luta lêc luta.” <sup>30</sup> Yesu nêl kiyang tige vô he ên wê he nêl ên he nêbê vimwo nipaên dô vac i nilô ge.

### *Yesu tae lie*

*(Matyu 12:46-50; Luk 8:19-21)*

<sup>31</sup> Yesu tae lie val le vixun, di vông kiyang la vô Yesu ên nêb i lam vô he. <sup>32</sup> Om xomxo wê dô ngivina Yesu gee nêl vô i ên nêbê, “Tame lime val le vixun ên nêb ob yê ông.” <sup>33</sup> Lêc Yesu nêl lax vô he ên nêbê, “Xomxo letya wê a tage lige ge?” <sup>34</sup> Mêd Yesu yê ma la xomxo wê dô i ngivina i ge di nêl ên nêbê, “Wê lê, ga a tage lige. <sup>35</sup> Ên xomxo wê timu vô Anutu kiyang ge, ge wê tu a tage lige ge.”

## 4

### *Kiyang pilepacên lec xomxo ti liloo vê vac yuac (Matyu 13:1-9; Luk 8:4-8)*

<sup>1</sup> Yesu lax mi la mia luaên Galili di lax nêl xolac vô xomxo vô mia ninya. Lêc xomxo tibeac hiwocên, om Yesu lec la lec dipac ti mi dô lec, di du mi la mahigun di nêl xolac vô xomxo wê dô kehe ge. <sup>2</sup> Yesu nêl kiyang pilepacên tibeac vô xomxo om nêl ti vô xomxo tigeê bêga nêbê, <sup>3</sup> “Xam ngô lê. Xomxo ti la ên nêb ob la liloo susu vê vac yuac. <sup>4</sup> Om liloo i la lê, lêc vê mangwe tô mi la dô vac môp om menac lam ya. <sup>5</sup> Di ya tô lec kibun nipwo tya wê dô lec ngidax kisii ge om tyip lutibed, <sup>6</sup> lêc ngilôhô la tulec ngidax om buc wê hiyôv linac ge od ya i vilôvac di i yib. <sup>7</sup> Di vê mangwe tô mi la dô vac hivu kehe lêc tyip hixôn hivu di hivu hivun xôn om o vuac nôn nivihha lêm. <sup>8</sup> Di vê mangwe tô mi la dô vac kibun nivihha om tyip di vuac nôn nivihha. Mêgem ya vuac nôn 30 di ya vuac 60 di ya 100.” <sup>9</sup> Yesu nêl bêge vô he di nêl hixôn ên nêbê, “Xomxo ti ninya obêc yêp ge od i ngô di xovô.”

### *Yesu nêl kiyang lec kiyang pilepacên (Matyu 13:10-17; Luk 8:9-10)*

<sup>10</sup> Dêc timuên Yesu vaci la dô viyonên, di nue ngivihhi hixôn xomxo wê mi dô hixôn i gee, he mîla vô i di la kinêg kiyang pilepacên kehe ên nêb i nêl kitong vô he. <sup>11</sup> Om Yesu nêl vô he ên nêbê, “Kiyang wê nêl lec Anutu môp yuu ben ge yêp xôpacên lê, lêc Anutu nêb ob hilung vô xam ên xam xovô. Di xomxo baba ge ngô kiyang tiyi xochê kiyang pilepacên pileva. <sup>12</sup> Om ‘he ob yê

lê, léc ob yêvô nôn ti lêm, di he ob ngô kiyang lê, léc he ob xovô kehe lêm, om he o tiyi wê he ob pilepac he ên Anutu i kitya he nê nipaên vêl ge lêm.’ ”

*Yesu nêl kiyang pilepacên kehe kitong  
(Matyu 13:18-23; Luk 8:11-15)*

<sup>13</sup> Yesu nêl vô he ên nêbê, “Xam obêc lungên kiyang pilepacên tige kehe ge od xam ob xovô kiyang pilepacên vihati ge kehe tibêna? <sup>14</sup> Kehe bêga nêbê vê wê xomxo tige la liloo ge tiyi xocbê Anutu xolac. <sup>15</sup> Di vê wê tô vac môp ge, tiyi xocbê xomxo wê ngô Anutu kiyang lê, léc lutibed Seten lam vô vêl ên he nilô. <sup>16</sup> Di vê wê tô mi la dô lec kibun nipwo tya wê dô lec ngidax kisii ge, ge tiyi xocbê xomxo wê ngô xolac di vông i vin lutibed hixôn xêyaa nivihã, <sup>17</sup> léc he tiyi xocbê ngec wê ngilôhô maên ge, om he dô nipwo tya léc xomxo obêc vông viyin vô he ên wê he vông i vin xolac ge od he sea vông vinên lutibed. <sup>18</sup> Di vê wê tô mi la dô vac hivu kehe ge, ge tiyi xocbê xomxo wê ngô xolac mi dô lê, <sup>19</sup> léc he vông nilô la vô susu yuu môp kibun ga di he xêyaa vin lec wê he nêb ob kô susu tibeac hixôn mone ge, om môp tige hivun xolac xôn di he o vô nôn nivihã lêm. <sup>20</sup> Léc vê wê tô mi la dô vac kibun nivihã ge, ge tiyi xocbê xomxo wê ngô xolac di vông i vin di vuac nôn tibeac, om vê ya vuac nôn 30 di he ya vuac 60 di ya vuac 100.”

*Kiyang pilepacên lec lam  
(Luk 8:16-18)*

<sup>21</sup> Yesu nêl ên nêbê, “Xomxo ti obêc byêx ngwax vac lam ge od ob lax i la vac dêg, me lax

i la le vac pêt ngibi, me? Ma, ob lax i le lec tevol kisii ên i linac vac vigwe. <sup>22</sup> Susu wê dô xôpacên ge vihati obêc val dô seac timuên, di kiyang wê yêp xôpacên ge obêc val yêp vac xêseac. <sup>23</sup> Xam ninyam obêc yêp ge od xam ngô di xovô.”

<sup>24</sup> Di Yesu nêl ên nêbê, “Kiyang wê xam ngô ge, xam vyac xovô nivaha lê. Ên môp wê xam vông vô xomxo ge Anutu obêc vông i tiyi wê xam vông vô he ge vô xam, di Anutu vaci obêc vông mangwe i luu wê xam vông vô lime ge vêl vô xam hixôn. <sup>25</sup> Ên xomxo obêc xovô xolac mi hêm pilihi ge od Anutu obêc kipyax tibeac lec hixôn vô i. Lêc xomxo obêc hêm xolac pilihi lêm ge, od nipwo tya wê yêp vac i nilô ge, Anutu obêc vô vêl.”

### *Kiyang pilepacên lec vê wê tyip ge*

<sup>26</sup> Yesu nêl ên nêbê, “Anutu ben kehe ge tiyi xocbê xomxo ti wê la lilo vê vê vac yuac ge, <sup>27</sup> lêc lax dô di buc ya la vêl lêc milax yê wê vê tyip mi vô levac ge, lêc o xovô kehe lêm. <sup>28</sup> Ên kibun vaci vông yuac lec, om vê tyip mi vô lihi lec di vuac nô, <sup>29</sup> di buc wê nô huu ge od xomxo tyo la ên nêb ob la yul nô.”

### *Kiyang pilepacên lec vixô nô*

*(Matyu 13:31-32,34-35; Luk 13:18-19)*

<sup>30</sup> Yesu nêl ên nêbê, “Anutu ben kehe ge tiyi vatya? Di il ob nêl kiyang pilepacên tibêna wê ob tiyi môp tige? <sup>31</sup> Ge tiyi xocbê vixô nô wê nipwo lee tya i luu nô baba vêl ge, <sup>32</sup> lêc xomxo obêc xin ge od obêc tyip mi vô levac luu susu

baba vêl di obêc sux ngen lec di menac lam vông liwihi lec mi dô vac hinyena.”

<sup>33</sup> Yesu obêc nêl xolac vô xomxo ge od mi nêl kiyang pilepacên tibêge tibeac vô he tiyi wê he ob xovô ge. <sup>34</sup> Lêc o nêl kiyang kehe yêp seac vô he hixôn lêm. Nge, nêl kiyang pilepacên pileva, di timuên wê he nue ngivihi vaci dô ge od Yesu nêl kiyang pilepacên kehe kitong vô he.

*Yesu nêl di viyiiên levac tip la  
(Matyu 8:23-27; Luk 8:22-25)*

<sup>35</sup> Vô buc tived tige vîgwe huc om Yesu nêl vô nue ngivihi ên nêbê, “Îl ob la mia luaên vilu ganê.” <sup>36</sup> Mêgem he sea xomxo tigeê dô di he lec dipac ti wê Yesu dô lec ge di he xôn loc mi la, di dipac ya la hixôn. <sup>37</sup> He mîla mahigun lê, lêc lea viyiiên mabu ti val om mia kipyax la vac dipac nilô di la pup lec. <sup>38</sup> Lêc Yesu la dô lec dipac viwen timuên di kiluu bazub lec kiluuên ti di yêp, om nue ngivihi la tipi vô di nêl vô ên nêbê, “Xolac kehe, vô kwabo lec wê il ob xib ge, lêc mêd ông o xovô il lêm, me?” <sup>39</sup> Mêd Yesu kidi lec di nêl vô lea yuu mia ên nêb lea i tip loc di mia i yêp kizêc, om lea tip la di mia yêp tipiên ma. <sup>40</sup> Mêd Yesu nêl vô nue ngivihi ên nêbê, “Bêna lêc xam xona? Vông vinên wê xam vông ge tyo nôn tina?” <sup>41</sup> Om he yetac mabu di nêl voma ên nêbê, “Xomxo tiga letya lêc lea yuu mia vô ninya lehe vô i?”

## 5

*Yesu tii vimwo nipaên vêl ên xomxo ti  
(Matyu 8:28-34; Luk 8:26-39)*



<sup>1</sup> Yesu he nue ngivihi loc mi la tibii Gelasa ben wê yêp mia luaên vilu ganê ge. <sup>2</sup> He mîla lop vêl ên dipac lêc xomxo wê vimwo nipaên dô vac i nilô ge ti lam vac vigwe yibên di lam vô Yesu. <sup>3</sup> Vuxtige ben wê mi dô vac ge, mi dô vac vigwe yibên, di xomxo ti o tiyi wê ob ku i xôn ge lêm. <sup>4</sup> Ên buc tibeac ge xomxo ku i vigê yuu vixa xôn ya sen lê, lêc xomxo tyo tax sen tip sea, di xomxo ti o tiyi wê ob hôm i xôn ge lêm, ên xêkizêc wê xomxo tige vông ge luu xêkizêc wê he vông ge vêl. <sup>5</sup> Vô vidiiên yuu bucên vihati ge xomxo tige mi vilee mi la vac vigwe yibên di la lec kitôn di mi iac di gôl ninivi sea ya ngidax.

<sup>6</sup> Xomxo tige yê wê Yesu val le teva ge om tup mi la vô di la yev vixa kitu vô. <sup>7-8</sup> Lêc Yesu nêl vô i ên nêbê, “Vimwo nipaên, ông lam loc vêl ên xomxo tige.” Mêgem xomxo tyo iac mabu di nêl ên nêbê, “Yesu, ông ge Anutu lag puunê nu ông, lêc ông ob vô vatya vô a? A le vô Anutu manôn di a kitaa ông bê ông o lêc vông a vô nipaên lêm.” <sup>9</sup> Mêd Yesu kinêg vô i ên nêbê, “Ông lêm le?” Di i nêl ên nêbê, “A lêg kehe bêga nêbê kidu levac, ên xe ga, xe tibeac.” <sup>10</sup> Mêd i kitaa Yesu tii vac vac ên nêb i o lêc tii vimwo nipaên i loc vêl ên vigwe tige lêm.

<sup>11</sup> Bwoc kidu levac vông zuac mi le lec kitôn, <sup>12</sup> om vimwo nipaên tigeê kitaa Yesu ên nêbê, “Ông vông xe la dô vac bwoc tiganêe.” <sup>13</sup> Mêd Yesu tyuc lec om vimwo nipaên tigeê lam la vêl ên xomxo tige di la dô vac bwoc tyoe nilô, mêd bwoc tigeê tup mi la vac vigwe madia di la tô vac mia luaên di num mia mi yib. Bwoc tigeê tibeac

hiwocên tiyi xocbê 2,000 lêc he yib mîma vêl.

<sup>14</sup> Mêd xomxo wê mi viac bwoc tige ge pec mi la, di mîla nêl kiyang tige kitong vô tibii vac vigwe levac hixôn vigwe nipwo viyang viyang ge. Om xomxo tibeac la ên nêb ob la yê han, <sup>15</sup> om he val vô Yesu lêc val yê xomxo ti wê vimwo nipaên dô vac ilage, lêc vimwo sea i di i piyôp vô nivîha lec di i vinyum nivîmihi lec di xeedô hixôn Yesu, om he yê di xona ên. <sup>16</sup> Di xomxo wê dô mi yê wê Yesu tii vimwo nipaên vêl ên xomxo tige, nêl kitong vô tibii wê val gee di nêl lec bwoc hixôn. <sup>17</sup> Om tibii tigege vihati kitaa Yesu ên nêb i loc vêl ên he ben.

<sup>18</sup> Mêgem Yesu lec dipac ên nêb ob lax mi la, lêc xomxo ti wê Yesu tii vimwo nipaên vêl ên i ge, lam kitaa Yesu ên nêb ob la hixôn i, <sup>19</sup> lêc Yesu nêl vô ên nêbê, “Ông la hixônên a ob ma, di ông lôc bom ên lôc nêl do levac wê Apumtau vông vô ông ge kitong vô lime di nêl lec wê Apumtau xo vigwe pisiv ên ông ge hixôn.” <sup>20</sup> Mêgem xomxo tyo lax mi la ben di la nêl kiyang wê Yesu vông i vô nivîha lec ge kitong vô xomxo vac vigwe levac Dekapolis vihati, om xomxo tigege ngô kiyang wê i nêl ge di yetac mabu.

*Jailas nu vêx, di vêx yidac ngwe, yuu kiyang  
(Matyu 9:18-26; Luk 8:40-56)*

<sup>21</sup> Yesu la lec dipac mi lax mi la mia luaên vilu ganê, mi la dô vô mia nînya di xomxo tibeac kitucma mi la vô i. <sup>22</sup> Mêd xomxo levac wê mi viac Yuda xumac lîlo ge ti lê nêbê Jailas yê wê Yesu val ge, om lam yev vîxa kitu vô <sup>23</sup> di kitaa vô i ên nêbê, “A nug vêx vông yidac mabu ti di

vô kwabo lec wê ob yib ge. Om a nêb ông lam vyax vigêm lec ên yidac i ma di i vô nivîha lec.”  
<sup>24</sup> Om Yesu la hixôn Jailas mi yuu la, lêc xomxo tibeac lam hivun Yesu xôn di he xôn la.

<sup>25</sup> Mêd vêx ti dô vac he mahîgun, lêc vêx tige, yidac kwatuacên vông i tiyi klismas 12, lêc yidac tige o ma lêm, <sup>26</sup> di i kô myavinê tibeac vô docta di sea i mone la mîma vêl, lêc yidac tige o tiyôô ên i lêm. Nge, yidac tige vô levac di dô xuhu dia. <sup>27</sup> Mêd vêx tyo ngô kiyang wê xomxo mi nêl lec Yesu ge om la vac xomxo tige mahîgun di la le vô Yesu nîmi di vyax vigê lec Yesu vinyumên. <sup>28</sup> Vông bêge ên xo ên nêbê, “A obêc vyax vigêg lec Yesu vinyumên ge od a obêc vô nigvîha lec.”  
<sup>29</sup> Om lutibed yidac tyo tip la di vêx tyo yaxên wê yidac tyo ma ên i ge. <sup>30</sup> Mêd Yesu yaxên wê xêkizêc wê i vông ge ya sea i, om pilepac i vac xomxo tige mahîgun di kinêg ên nêbê, “Letya hôm vigê lec vinyumên wê a vông ge?” <sup>31</sup> Lêc nue ngivîhi nêl vô i ên nêbê, “Xomxo tibeac le i ngivîna ông xôn, lêc bêna lêc ông kinêg ên ông nêbê letya vyax vigê lec ôngê?” <sup>32</sup> Lêc Yesu yê i vivac vô he vîhati ên nêb ob yê xomxo ti wê vyax vigê lec i ge, <sup>33</sup> mêd vêx tige xovô wê xêkizêc wê Yesu vông ge la vông i vô nivîha lec ge om xona di la hixôn ni yetacên di la yev vîxa kitu vô Yesu di nêl i kiyang kitong vîhati vô Yesu. <sup>34</sup> Mêd Yesu nêl vô i ên nêbê, “Nuge, vông vinên wê ông vông ge vông ông vô nivîha lec, om ông lôc hixôn xêmyaa nivîha, ên yidac wê ông vông ge tip la gwêba pyap.”

<sup>35</sup> Yesu gên nêl kiyang, dêc xomxo vac Jailas

ben val nêl vô Jailas ên nêbê, “Num vêx yib gwêba, om le i lêc vông yuac levac vô xolac kehe lêm.” <sup>36</sup> Yesu ngô kiyang wê he nêl ge lêc o vông i vin lêm, om nêl vô Jailas ên nêbê, “Xonaên i ma di ông vông i vin.” <sup>37</sup> Mêd Yesu nêl ên nêbê xomxo vihati i dô om he dô di Yesu kô Jems yuu li Jon di Pita mi he la. <sup>38</sup> He mila vô kwabo lec Jailas ben lêc Yesu ngô wê xomxo byag di vô nididun tibeac ge, <sup>39</sup> om la xumac lôma di la nêl vô he ên nêbê, “Bêna lêc xam byag di vô nididun tibeac? Vêx tige o yib ti. Nge, ici va yêp.” <sup>40</sup> Mêd he nap lec kiyang wê Yesu nêl ge. Om Yesu vông he vihati la vixun, di kô vêx tyo ta yuu ma hixôn nue ngivihî yon di he la vac xumac nilô ti wê vêx tyo diyêp vac ge. <sup>41</sup> Mêd Yesu la hêm lec vêx tyo vigê di nêl vô i ên nêbê, “Talita kumi.” Kiyang tige kehe bêga nêbê, “Vêx, a nêl bê ông kidi lec.” <sup>42</sup> Om lutibed vêx tyo kidi lec mi vilee. Vêx tige, klismas wê i vông ge tiyi xocbê 12. Di he wê he dô mi yê gee yetac mabu. <sup>43</sup> Lêc Yesu nêl kiyang xêkizêc vô he ên nêbê, “Xam o lêc nêl ga kitong vô xomxo ti lêm.” Di nêl vô he ên nêbê, “Xam vông yaên vô vêx tyo ên i ya.”

## 6

### *Xomxo Nasalet vô nîmi vô Yesu (Matyu 13:53-58; Luk 4:16-30)*

<sup>1</sup> Yesu sea vigwe tige di lax mi la Nasalet wê i ben kehe ge, dêc nue ngivihî la hixôn. <sup>2</sup> He dô di buc sabat ge od Yesu la vac xumac lilo di la nêl xolac vô xomxo. Om xomxo tibeac ngô i kiyang di yetac mabu di nêl ên nêbê, “Xomxo tige kô

kiyang yuu piyôp vô letya lêc mi vông do levac tibêgee? <sup>3</sup> I ge xomxo wê xumac loxên ge ti, wê Malia nu ge, om i lie Jems yuu Josis di Judas yuu Saimon. Di lie vêx dô hixôn il ga.” He nêl bêge di he nêlô vô viyin di he yê Yesu nipaên. <sup>4</sup> Mêd Yesu nêl vô he ên nêbê, “Vac vigwe viyang viyang ge, xomxo ob kô plopet lec, dom plopet tyo tae mae lie hixôn xomxo vac i ben vigwe kehe obêc kô i lê lec lêm.” <sup>5</sup> Om Yesu o tiyi wê ob vông do tibeac vac ben Nasalet ge lêm, di i vyax vigê lec xomxo yidac titi di vông he vô nivîha lec. <sup>6</sup> Mêd Yesu yê wê lie Nasalet o vông i vin i lêm ge, om xo bêga nêbê, “Bêna lêc he o vông i vin a lêmê?” Mêgem Yesu sea Nasalet di loc mi la vîlee vac vigwe toto di la nêl xolac vô tibii.

*Yesu vông yuac vô nue ngîvihi  
(Matyu 10:5-15; Luk 9:1-6)*

<sup>7</sup> Yesu keac nue ngîvihi vigê yuu di tô mi la yuu la vô i, di vông he yuu yuu loc mi la, di vông xêkizêc wê i vông ge vô he ên nêb he i loc tii vimwo nipaên vêl ên xomxo, <sup>8</sup> di nêl vô he ên nêbê, “Xam hêm pîtoa vac vigêm di loc, di xam o lêc kô susu ya hixôn lêm, xocbê yaên yuu vîxec di mone hixôn lêm. <sup>9</sup> Xam su su lec vîxam, di xam vînyum vînyumên tibed lec, di xam o lêc kô vînyumên ngwe hixôn lêm. <sup>10</sup> Di xam obêc la vac vigwe ti mi la dô vac xumac ti ge od xam dô vac xumac tige tibed i tiyi buc wê xam ob dô ge. Pyap dêc xam sea vigwe tige di loc bangwe. <sup>11</sup> Lêc xam obêc mîla vac vigwe ti di xomxo viyang tige o hêm xam lec nivîha lêm di o ngô kiyang wê xam nêl ge lêm ge od xam liloo vîjuva vêl ên vîxam

pitehe ên i nêl he nêl nipaên kitong vô he di loc.” <sup>12</sup> Om Yesu nue ngivihi loc mi la, di la nêl xolac vô xomxo ên nêbê he i pilepac he, <sup>13</sup> di he tii vimwo nipaên vêl ên xomxo tibeac, di xomxo yidac tibeac ge, he lipac wel lec he di vông he vô nivaha lec.

*Jon Lipacên yib*

*(Matyu 14:1-12; Luk 3:19-20; Luk 9:7-9)*

<sup>14</sup> Hizap levac Helot ngô kiyang wê tibii mi nêl lec Yesu ge, ên xomxo nêl Yesu kitong la vô levac vac vigwe tibeac, om he ya nêl ên he nêbê Yesu ge Jon Lipacên wê yib ge, kidi lec nang om vông do levac ya xêkizêc wê i vông ge. <sup>15</sup> Lêc xomxo ya nêl ên he nêbê ge plopet Ilaija, di ya nêl ên nêbê Yesu ge plopet tiyi xocbê plopet wê dô ilage ti. <sup>16</sup> Mêd Helot ngô kiyang wê he mi nêl ge di nêl ên nêbê, “Ge Jon Lipacên wê a kitov i kwa tip mi i yib ilage lêc kidi lec maviha vac yibên.”

<sup>17-18</sup> Kiyang wê Helot hi Jon yib ilage bêga nêbê ilage Helot kô li Pilip vinê Helodias om Jon Lipacên la nêl vô Helot ên nêbê, “Môp wê ông kô lim tuc vinê ge tiiyên ma.” Mêgem Helodias kunac Jon di nêl vô Helot om Helot vông tibii la hôm Jon xôn di tung i la dô vac xumac kalabuhu. <sup>19</sup> Mêd Helodias xêyaa vô myavinê mabu vô Jon di nêl nêb ob hi Jon yib, lêc tiiyên ma, <sup>20</sup> ên Helot xovô nêbê Jon ge xomxo nivaha di i ngibua, om Helot xona ên Jon di viac i nivaha ên nêb Helodias i o lêc vông i vô nipaên lêm. Mêd Helot obêc ngô kiyang wê Jon mi nêl ge, od vông i nilô vô himena himena, lêc Helot xêyaa vin lec kiyang wê Jon mi nêl ge om nêb ob ngô.

<sup>21</sup> Mêd Helodias myag môp wê ob hi Jon i yib lec ge, om Helot buc wê ta kô i lec ge Helot myêl vizid levac di tyuc gavman levac hixôn tibii vevac wê levac ge di xomxo Galili levac vihati gee lam.

<sup>22</sup> He dô mi ya lêc Helodias nu vêx lam yoo vô he, di Helot hixôn xomxo wê lam ya hixôn i ge vihati xêyaa vin lec i, om Helot nêl vô vêx tyo ên nêbê, “Ông obêc nêb kô susu ti ge od ông nêl kitong vô a di a ob vông vô ông.” <sup>23</sup> Om Helot hilu kiyang xôn vô i di nêl ên nêbê, “A nêl hixôn nô n vô ông bêga bê ông obêc kitaa susu ti vô a ge, od a ob vông vô ông. Om ông obêc kitaa a ên ông nêbê a vông kibun wê a vông ge viwen i tu ông lê m i lec ge od a ob vông i tiyi wê ông nêl ge.”

<sup>24</sup> Mêd vêx tyo lax mi la kinêg vô ta ên nêbê, “Tag, ông nêb a kitaa susu vatya?” Om ta nêl vô ên nêbê, “Ông lôc nêl bê ông ob kô Jon Lipacên bazub.” <sup>25</sup> Mêd vêx tyo ngô kiyang wê ta nêl ge om tup mi lax vô Helot di lax nêl vô ên nêbê, “A nêb ông tung Jon Lipacên bazub lec pile ti mi vông vô a lutibed.” <sup>26</sup> Helot ngô kiyang wê vêx tyo nêl ge di nêl vô viyin mabu, lêc xovô kiyang wê hilu xôn di xomxo tibeac dô mi ngô hixôn ge, om nêb ob pwoo kiyang wê nêl vô vêx tyo ge vac lê m. <sup>27</sup> Mêgem Helot vông tibii vevac ti la ên nêb i loc kô Jon bazub, om tibii tyo la vac xumac kalabuhu di la kitov Jon kwa tip, <sup>28</sup> di tung bazub lec pile di kô mi lax vông vô Helodias nu vêx tige di i kô mi la vông vô ta.

<sup>29</sup> Mêd Jon nue ngivihhi ngô wê i yib ge om he val kô Jon nô n mi la yev.

*Yesu vet xomxo 5,000  
(Matyu 14:13-21; Luk 9:10-17; Jon 6:1-13)*

<sup>30</sup> Nue ngivihi wê Yesu vông he la ge vena nêl kiyang wê he la nêl ge hixôn yuac wê he la vông ge kitong vô Yesu. <sup>31</sup> Lêc xomxo tibeac la di lôm vô Yesu he nue ngivihi om hîyôv manôn wê he ob dô seac vêl di ya yaên ge ma. Mêgem Yesu nêl vô he ên nêbê, “Xam lam ên il ob la vac vigwe wê mahîgun pileva di xomxo ti dôên ma ge ên xam loc dô seac vêl.” <sup>32</sup> Om Yesu he nue ngivihi, heche va la lec dipac di mîla vac vigwe wê xomxo ti o dô vac ge lêm.

<sup>33</sup> Lêc xomxo tibeac yê wê he la ge di xovô he om xomxo vac vigwe buhu toto ge tup mî la ên nêb he ob la vac vigwe ti wê Yesu he nue ngivihi obêc mîla vac ge. Om he mug la tax, <sup>34</sup> dêc Yesu he nue mîla timuên, mêd he lop vêl ên dipac di Yesu yê wê xomxo tibeac val dô ge om xo vigwe pisiv ên he, ên he dô tiyi xochê bwoc sipsip wê ma ti o viac he ge lêm om Yesu nêl kiyang tibeac vô he.

<sup>35</sup> Mêd hîyôv hoo la di vigwe huc om nue ngivihi la nêl vô Yesu ên nêbê, “Vigwe ga, vigwe mahîgun pileva ti di hîyôv hoo la gwêba, <sup>36</sup> om ông vông xomxo i loc vac vigwe viyang viyang ên loc kisuu xen yaên wê ob ya ge.” <sup>37</sup> Lêc Yesu nêl vô he ên nêbê, “Xacxam va vông yaên vô he ên he i ya.” Lêc he nêl vô i ên nêbê, “Obêc bêna? Ông nêb xe la kisuu blet lec mone yul yuu mî lôm vông vô he ên he i ya, me?” <sup>38</sup> Mêd Yesu kinêg lax vô he ên nêbê, “Blet vaba dô? Xam loc wê lê.” Om he lax yê di vena nêl ên nêbê, “Blet vigê vilu di beac nôn yuubed dô.”



<sup>39</sup> Om Yesu nêl vô he ên nêbê, “Xam tô mi dô kibun lec hisinac di xam dô kidu kidu.” <sup>40</sup> Om he tô mi dô kidu kidu léc ya dô tiyi xocbê 100 di ya dô tiyi xocbê 50. <sup>41</sup> Mêd Yesu hóm blet vigê vilu ge hixôn beac yuu ge di lax ma la lag kisiinê di kitaa lec blet yuu beac, mêd hibû blet di vông vô nue ngivihî ên nêb he i titang vô xomxo tigeê. Nang dêc hibû beac di vông vô nue nêb he i titang vô xomxo tigeê hixôn mi he ya. <sup>42</sup> Om xomxo vihati ya i den he, <sup>43</sup> léc blet yuu beac wê gên dô ge nue ngivihî su vac sepac vigê yuu di tô mi la yuu mi i pup lec. <sup>44</sup> Xomxo wê dô mi ya gee, he vux tiyi xocbê 5,000 ge.

*Yesu la lec mia luaên kisii  
(Matyu 14:22-33; Jon 6:16-21)*

<sup>45</sup> Yesu nêl vô nue ngivihî nêb he i lec dipac di loc mug mi loc vigwe Betsaida wê yêp mia luaên vilu ganê. Om he loc mi la di Yesu dô ên nêb ob vông xomxo tigeê i lôc ben vêl lê. <sup>46</sup> He la vêl mêd Yesu loc mi la lec kitôn ên nêb ob la kitaa. <sup>47</sup> Mêd vigwe buc di dipac wê nue ngivihî dô lec ge mila le vac mia luaên mahigun, di Yesu vaci gên dô vô mia luaên ninya, <sup>48</sup> di yê wê lea levac hóm dipac xôn hixôn nue ngivihî om he vông yuac levac lec hisooên mia léc dipac o vyac la lêm, di vô kwabo lec wê vigwe ob vidii ge mêd Yesu lam lec mia kisii di val vô nue ngivihî di vông xocbê ob luu he vêl mi la ge. <sup>49</sup> Léc nue ngivihî vihati yê wê Yesu lam lec mia kisii mi val ge om he so ên he nêb mêd xomxo wê yibên ge ti kinu val vô he, om he iac <sup>50</sup> di xona mabu. Léc lutibed Yesu nêl vô he ên nêbê, “Xam xonaên i ma di xam xêmyaa i vô nivihî, ên ga a.” <sup>51</sup> Mêd

Yesu lec la lec dipac hixôn he di lea tip la. Lêc nue ngivihî yetac mabu, <sup>52</sup> ên he o xovô môp wê Yesu vông blet vô tibeac vihevage lêm, ên he nilô yen xêkizêc om he vvac xovôên ma.

*Yesu vông xomxo tibeac vô nivîha lec gê  
Gênesalet  
(Matyu 14:34-36)*

<sup>53</sup> Mêd Yesu he nue ngivihî la lec dipac la mia luaên vilu ganê di la vac vîgwe Gênesalet, di ku dipac xôn mi i yêp <sup>54</sup> di he lop mi la, lêc lutibed xomxo vac vîgwe tige xovô Yesu, <sup>55</sup> om he tup mi la vac vîgwe tige vîhati di la ken lie wê yidac ge lec pêt mi la vac vîgwe wê Yesu la dô vac ge. <sup>56</sup> Om Yesu ob la vac vîgwe levac ti me nipwo ti me vîgwe mahîgun ti ge od xomxo ken lie yidac mi la lii lec wetôv di kitaa Yesu nêb he ob hôm lec vînyumên wê i vông ge myahîpu ên yidac i ma ên he, om he wê hôm vîgê lec vînyumên wê Yesu vông ge he vîhati vô nivîha lec.

## 7

*Anutu xolac ngînoo xomxo vông xolac vêl  
(Matyu 15:1-9)*

<sup>1</sup> He Palisi hixôn xomxo wê xovô Moses xolac ge wê he ben Jelusalem ge, he ya kitucma mi la vô Yesu, <sup>2</sup> lêc yê wê Yesu nue ngivihî ya yaên lêc he o lipac vîgê tiyi xocbê môp wê he Yuda mi vông ge lêm. Om he nêl ên he nêbê he ya ya vîgê ningeac. <sup>3</sup> Ên he Palisi hixôn Yuda vîhati, he mi timu vô môp wê bue ilage vông ge bêga nêbê xomxo obêc lipac vîgê tiyi xocbê môp wê bue mi vông ge pyap di ya yaên timuên. Lêc lipacên

obêc ma ge od ob ya yaên lêm. <sup>4</sup> Di he ob la kisuu yaên vac maket ge od ob vena lipac pyap lêc ya timuên. Di he mi timu vô môp wê bue vông ge tibeac hixôn, xocbê môp wê ob lipac kap yuu pile hixôn dêg ge. <sup>5</sup> He vông môp bêge om Palisi hixôn xomxo wê xovô Moses xolac gee nêl vô Yesu ên nêbê, “Bêna lêc ông nume sea môp wê buge vông ge di ya hixôn vigê ningeacê?” <sup>6</sup> Lêc Yesu nêl vô he ên nêbê, “Kiyang wê plopet Aisaia kiyuu ilage nêl nôn lec xam xomxo kityooên di i yêp bêga nêbê,

‘Xomxo tigeê pimil a ya mya pileva, lêc he nêlô le teva ên a. <sup>7</sup> He mi nêl kiyang wê xomxo vaci xovô ge, lêc he nêl ên he nêbê he nêl Anutu kiyang, om he yev vixa kitu vô a pisiv.’

<sup>8</sup> Om a nêl vô xam bêga bê xam sea Anutu xolac la yêp xel di la timu vô môp wê xomxo vaci mi vông ge.”

<sup>9</sup> Di Yesu nêl hixôn vô he ên nêbê, “Tyac xam so ên xam nêb môp wê xam sea Anutu xolac di la timu vô bume môp ge ob vô nivîha vô xamê?”

<sup>10</sup> Ên xolac wê Moses nêl ge bêga nêbê, ‘Xam hêm tame mame lê lec di ngô he kiyang’, di kiyang ngwe nêl ên nêbê, ‘Xomxo ti obêc nêl kiyang nipaên lec ta yuu ma ge od xomxo i hi i yib.’ <sup>11</sup> Anutu xolac nêl bêge, lêc xam mi nêl ên xam nêbê xomxo ti nêl susu wê ob ngidu ta yuu ma xôn ya ge obêc dô, lêc xomxo tige obêc nêl vô yuu ên nêbê, ‘Susu tige a nêl pyap ên a nêb a ob vông vô Anutu, om muu nêl ob ma.’

<sup>12</sup> Om môp tige tiyi xocbê xam le vac môp wê

xomxo tige ob ngidu ta yuu ma xôn ge. <sup>13</sup> Om môt wê xam timu vô bume vông xolac mi hôm xôn mi i yêp ge tiyi xocbê xam kitya Anutu xolac vêl. Lêc xam mi vông môt tibêge tibeac hixôn.”

*Susu wê ob vông xomxo vô nipaên  
(Matyu 15:10-20)*

<sup>14</sup> Yesu keac xomxo lam vô i di nêl vô he vihati ên nêbê, “Xam vihati ngô kiyang wê a ob nêl ge di xovô lê. <sup>15</sup> Susu wê ob la vac xomxo nilô ge o tiyi wê ob vông he vô nipaên ge lêm. Lêc susu wê yêp vac xomxo nilô di lop mi lam seac ge wê ob vông he vô nipaên. <sup>16</sup> [Xam ninyam obêc yêp ge od xam ngô nêl di xovô.]”

<sup>17</sup> Mêd Yesu sea xomxo tige di la xumac lôma, lêc nue ngivihî la kinêg kiyang pilepacên tige kehe vô i. <sup>18</sup> Om Yesu nêl vô he ên nêbê, “Ên xam êno, xam lungên kiyang tige kehe? Susu wê xomxo ob ya mi i la vac he nilô ge o tiyi wê ob vông he vô nipaên ge lêm, lêc mêd xam lungên tige? <sup>19</sup> Susu yaên ob vông xomxo vô nipaên lêm, ên ob la vac he piyôp yuu xovôên hixôn lêm. Nge, ob la dô vac xêyaa di lop mi la vêl.” Yesu kiyang tige nêl ên nêbê susu yaên vihati nivihî tiyi wê xomxo ob ya ge. <sup>20</sup> Di Yesu nêl vô he ên nêbê, “Kiyang wê yêp vac xomxo nilô lêc lop mi lam vixun ge wê ob vông he vô nipaên. <sup>21</sup> Ên kiyang nipaên wê yêp vac xomxo nilô lêc lam le seac ge bêga nêbê xovôên nipaên, môt yôdac vêx yuu vux, vunên xomxo susu yôdac, hiên xomxo yib, <sup>22</sup> vông môt iimaên vô nipaên, môt madoên, môt nipaên yaya, nêl kiyang kityoên, vông môt vaxvax, yê xomxo nipaên, nêl kiyang

nipaên lec xomxo, yong he, di vông môp vaxvax tiyi xocbê piyôp nivihã ti o yêp vô he lêm. <sup>23</sup> Môp nipaên tigeê wê mi yêp vac xomxo nilô, om obêc lop mi lam vixun ge od ob vông xomxo vô nipaên.”

*Pinisia vêx ti vông i vin Yesu  
(Matyu 15:21-28)*

<sup>24</sup> Yesu sea vigwe tige di loc mi la vigwe ti wê yêp kwabo vô Taia ge, mêd la dô vac xumac ti ên nêb ob dô di xomxo yêên i i ma, lêc o tiyi wê ob dô xôpacên ge lêm. <sup>25-26</sup> Mêd vêx ti wê vimwo nipaên dô vac i nu vêx ge ngô wê Yesu lam dô vac xumac tige. Vêx tige o vêx Yuda lêm. Nge, i tibii Pinisia ti wê i ben vigwe kehe Silia ge. Lêc la vô Yesu di la yev vixa kitu vô di kitaa i ên nêbê i tii vimwo nipaên vêl ên nu vêx.

<sup>27</sup> Lêc Yesu nêl vô i ên nêbê, “Il ob vông yaên vô nipwo mi he ya vêl lê, ên o tiyi wê il ob kô nipwo xen yaên mi nêx i loc vô noo ge lêm.”\*

<sup>28</sup> Lêc vêx tyo nêl ên nêbê, “Xomxo levac, ông nêl kiyang nô. Lêcom myapipu wê tô mi la dô vac tevol kwa ngibi ge, noo ya.” <sup>29</sup> Om Yesu nêl vô i ên nêbê, “Kiyang wê ông nêl ge nivihã, om ông lôc bom, ên vimwo nipaên sea num gwêba di i vô nivihã lec.” <sup>30</sup> Mêgem vêx tyo lax mi la ben di yê wê nu tyo diyêp lec pêt ge di xovô nêbê vimwo nipaên sea i di la.

---

\* **7:27:** Kiyang wê Yesu nêl lec nipwo yuu noo ge, ge kiyang pilepacên wê nêl lec he Yuda hixôn tibii ba. ên he Yuda yê tibii wê o Yuda lêm ge nipaên, nêb he tiyi xocbê noo. Om nipwo tige tixuu lec he Yuda, di noo tixuu lec tibii ba wê o Yuda lêm ge.

*Yesu vông xomxo wê yac di ninya vô kitu ge ti vô nivaha lec*

<sup>31</sup> Yesu sea vigwe Taia ên nêb ob la mia luaên Galili, om la Saidon di la Dekapolis di mila mia luaên Galili. <sup>32</sup> Lêc xomxo kô vux ti wê ninya vô kitu di vyac keacên ma ge mi la vô Yesu, di kitaa Yesu nêb Yesu i vyax vigê lec xomxo tige ên i vô nivaha lec. <sup>33</sup> Om Yesu kô xomxo tige mi yuu la le vïyonên mêd Yesu kitiv vigê liyihî la vac xomxo tyo ninya vilu vilu, mêd pisuv myaluc lec vigê di kitiv lec xomxo tyo get. <sup>34</sup> Mêd Yesu lax ma la lag kisii di vê myakilôhô xêkizêc di nêl vô xomxo tyo ên nêbê, “Epata.” Kiyang tige kehe bêga nêbê, “Ninyam i toc di ông ngô vigwe.” <sup>35</sup> Mêgem xomxo tige ninya toc di i ngô kiyang di get vô vïyin maên di i keac nivaha. <sup>36</sup> Lêc Yesu vibu xomxo tige xêkizêc ta ên nêb he i o lêc nêl tige kitong vô xomxo ya lêm. Yesu nêl kiyang tige tii vac vac vô he, lêc he o ngô lêm di he la nêl kiyang tige vô levac vô xomxo mi he ngô hixôn, <sup>37</sup> om he yetac mabu di nêl ên nêbê, “Môp wê i vông ge vïhati nivaha, di ici va tïyi wê ob vông xomxo ninya kitu, he ninya i toc ên he i ngô kiyang, di vông xomxo wê yac ge he i keac nivaha.”

## 8

*Yesu vet xomxo 4,000  
(Matyu 15:32-39)*

<sup>1</sup> Vô buc ti nang xomxo tibeac kitucma vô Yesu mi dô hixôn i, lêc he xen yaên wê he ob ya ge ma, om Yesu nêl nue ngivihî lam di nêl vô he ên nêbê, <sup>2</sup> “A xo vigwe pisiv ên xomxo tigae, ên

he lam dô hixôn a tiyi buc yon di he xen yaên wê he ob ya ge ma, <sup>3</sup> om he obêc dô vip d'êc a vông he lax mi la ge od vip ob vông he vigê yuu vixa ma vac môp, ên he ya lam vac vigwe teva.” <sup>4</sup> Lêc nue ngivihî nêl vô i ên nêbê, “Om il ob la kô yaên gê na ên vông vô xomxo tigea mi he i ya? Ên vigwe ga, vigwe myadongên.” <sup>5</sup> Om Yesu kinêg vô he ên nêbê, “Xam blet vaba dô?” Di he nêl ên nêbê, “Xe blet vigê vilu di sec yuu dô.”

<sup>6</sup> Om Yesu nêl vô xomxo tigea vihati ên nêb he i tô mi dô kibun, mêd hêm blet vigê vilu di sec yuu ge di kitaa lec mêd hibû di vông vô nue ngivihî ên nêb he i titang vô xomxo, om nue ngivihî kô mi la titang vô he vihati. <sup>7</sup> Di beac nipwo ya dô om Yesu kitaa lec di vông vô nue ngivihî ên nêb he i loc titang vô xomxo tigea ên he i ya hixôn. <sup>8</sup> Mêd xomxo tigea ya i tiyi he di myapipu dô om he tung vac sepat vigê vilu di sec yuu mi i pup lec. <sup>9</sup> Xomxo tigea tiyi xocbê 4,000 ge. Pyap di Yesu vông he lax mi la ben, <sup>10</sup> di lutibed Yesu he nue ngivihî loc mi la lec dipac di la vigwe Dalmanuta.

*Palisi nêb ob yê do levac  
(Matyu 16:1-4)*

<sup>11</sup> Palisi ya val vô Yesu, ên nêb ob yaxên i, om la nga ên kiyang wê Yesu nêl ge di nêl nêb Yesu i vông do lag puunê ti hixôn ên he ob yê. <sup>12</sup> Om Yesu nilô vô viyin di i nêl ên nêbê, “Bêna lêc xomxo gwêbaga nêl nêb he ob yê do levacê? A nêl hixôn nôn vô xam bêga bê xomxo wê dô gwêbaga ob yê do levac ti lêm.” <sup>13</sup> Mêd Yesu sea

he di la lec dipac di loc mi la mia luaên Galili vilu ganê.

*Yesu nêl kiyang pilepacên lec yis  
(Matyu 16:5-12)*

<sup>14</sup> Yesu nue ngivihi la hixôn lêc he o xovô mi kô xen blet ti hixôn lêm, di blet nôn tived yêp vac dipac. <sup>15</sup> Mêd Yesu nêl kiyang xêkizêc vô he ên nêbê, “Xam xona nêc ên yis wê he Palisi hixôn Helot vông ge.” <sup>16</sup> Mêd Yesu nue ngivihi nêl vông, ên he so ên he nêb mêd Yesu nêl kiyang tige lec he xen blet wê ma ge. <sup>17</sup> Lêc Yesu xovô kiyang wê he nêl vông ge om nêl vô he ên nêbê, “Bêna lêc xam nêl ên xam nêbê xam xom blet ma? Mêd xam gên o xovô lêmê? Xam nilôm xêkizêc ên vatya? <sup>18</sup> Xam mamnôn yêp lêc mêd xam o wê lêm? Di xam ninyam yêp lêc mêd xam o ngô kiyang lêm? Di yuac wê a vông vac xam mahigun ge, xam mêd lungên? <sup>19</sup> Om buc wê a hibû blet vigê vilu di vet xomxo 5,000 ya ge, od xam su myapîpu vac sepac vaba?” Om he nêl ên nêbê, “Sepac vigê yuu di tô mi la yuu.” <sup>20</sup> Mêd Yesu nêl nang ên nêbê, “Di buc wê a hibû blet vigê vilu di sec yuu di vet xomxo 4,000 ya ge od xam su myapîpu vac sepac vaba?” Mêd he nêl ên nêbê, “Sepac vigê vilu di sec yuu.” <sup>21</sup> Om Yesu nêl vô he ên nêbê, “Xam gên o xovô tige lêmê?”

*Yesu vông xomxo manôn tocên ti vô nivîha lec gê Betsaida*

<sup>22</sup> He mîla vigwe Betsaida mêd xomxo kô vux wê manôn toc ge ti mi la vô Yesu di la kitaa Yesu nêb i vyax vigê lec i ên manôn i seac. <sup>23</sup> Om Yesu la hóm lec xomxo tige vigê di didii i mi yuu la



ninyawehe, mêt Yesu pisuv myaluc lec xomxo tyo manôn di vyax vigê lec di kinêg ên nêbê, “Ông mamnôn seac mi ông wê susu ya?” <sup>24</sup> Mêt xomxo tyo yê ma la di nêl vô Yesu ên nêbê, “A xê xomxo lê, lêc a xê he tiyi xocbê xax wê vô videba videba mi lam ge di a o xêvô he nôl lêm.” <sup>25</sup> Mêt Yesu vyax vigê lec xomxo tyo manôn tii vac mêt xomxo tyo yê vigwe xêkizêc di manôn vô nivihha lec om i yê vigwe vîhati yêp seac. <sup>26</sup> Mêt Yesu nêl vô i ên nêbê, “Ông lôc vac bom bôbac di ông o lêc loc vigwe Betsaida lêm.”

*Pita nêl Yesu kitong nêb i Kîlisi  
(Matyu 16:13-20; Luk 9:18-21)*

<sup>27</sup> Yesu he nue ngîvihi loc mi la, nêb ob la vigwe Sisalia Pilipai om he mîla môp ti, lêc Yesu kinêg vô nue ngîvihi ên nêbê, “Xomxo mi nêb a letya?” <sup>28</sup> Om he nêl vô i ên nêbê, “Xomxo ya nêbê ông ge Jon Lipacên, di ya nêbê ông plopet Ilaija, di ya nêbê ông plopete ti.” <sup>29</sup> Om Yesu kinêg vô he ên nêbê, “Di xacxam va nêb a letya?” Mêt Pita nêl ên nêbê, “Ông Kîlisi ti wê Anutu vông ông lam ên nêb ông lam ngidu xomxo xôn ge.” <sup>30</sup> Mêtgem Yesu vîbu he nêb he i o lêc nêl i kitong vô xomxo lêm.

*Yesu nêl myavinê wê ob tulec i ge kitong  
(Matyu 16:21-28; Luk 9:22-27)*

<sup>31</sup> Yesu nêl kiyang vô nue ngîvihi ên nêbê, “A, Xomxo Nu, a obêc kô myavinê levac mabu, di Yuda levac hixôn xomxo levac wê mi si daa vô Anutu gee di xomxo wê xovô Moses xolac gee, he obêc vô nîmi vô a di hi a xib, di buc yon obêc lam

la vêl di a obêc kidi lec magviha i tii vac.” <sup>32</sup> Yesu nêl kiyang tige seac vô he om Pita kô Yesu mi yuu la dô viyonên, mêd Pita nêl xêkizêc vô Yesu ên nêb i nêlên kiyang tibêge i ma. <sup>33</sup> Lêc Yesu pilepac manôn lax vô nue ngivihi di nêl xêkizêc vô Pita ên nêbê, “Seten, ông loc vêl. Ên xovôên wê ông vông ge o tiyi xocbê xovôên wê Anutu vông ge lêm. Nge, xovôên wê ông vông ge tiyi xocbê xovôên wê xomxo kibun ga vông ge.”

<sup>34</sup> Yesu keac nue ngivihi hixôn xomxo tibeac ên nêb he i loc vô i, om nêl vô he ên nêbê, “Xomxo ti obêc nêb timu vô a vixag ge od i vông i vô nipwo lec di kilê viyin i tiyi xocbê kilê xax pola ge di timu vô a vixag. <sup>35</sup> Ên xomxo ti obêc nêb viac ninivi ên viyin yuu yibên ge od maviha wê i vông ge xôa obêc ma, lêc xomxo ti obêc sea ninivi lec a lêg yuu xolac ge od ob dô maviha. <sup>36</sup> Ên xomxo ti obêc kituc susu kibun ga vihati tu ixê, lêc obêc sea môp wê ob dô maviha ya ge od ob vô niviha vô i tibêna? <sup>37</sup> Di xomxo obêc vông vatya ên kisuu maviha wê ob dô ya ge? <sup>38</sup> Xomxo gwêbaga sea Anutu di la vac môp nipaên, om xomxo ti vac he mahigun obêc vô nimi vô a hixôn a kiyang ge od a, Xomxo Nu, a êno obêc vô nimig vô i lec buc wê a obêc lop mi lôm hixôn angela ngibua di lam hixôn xêseac wê Mag vông ge.”

## 9

<sup>1</sup> Mêd Yesu nêl vô he ên nêbê, “A nêl hixôn nôn vô xam bêga bê xam wê xam le ga, xam ya obêc dô mamviha di wê xolac wê Anutu ben kisiinê ge obêc val hixôn xêkizêc.”

*Yesu ninivi pikwê  
(Matyu 17:1-13; Luk 9:28-36)*

<sup>2</sup> Buc vigê vilu di sec ti lam la vêl mêd Yesu kô Pita yuu Jems yon Jon di he la lec kitôn dia ti, di heche va la dô, lêc yon yê wê Yesu ninivi pikwê mi vô bangwe, <sup>3</sup> di i ngakwi vô kwem vîvea lecên luu ngakwi kibun ga wê xomxo lipac i vô kwem ge vêl. <sup>4</sup> Mêd yon yê wê Moses yuu Ilaija val keac hixôn Yesu ge. <sup>5</sup> Om Pita nêl vô Yesu ên nêbê, “Xolac kehe, ga nivîha wê il dô ga, om xen ob lox xumac yon, ti vô ông, di ngwe vô Moses di ti vô Ilaija.” <sup>6</sup> Pita nêl bêge pileva, ên yon xona mabu om Pita o xovô kiyang wê ob nêl ge lêm. <sup>7</sup> Mêd vîyobtoc ti lam hivun he xôn, di vya ti lam vac vîyobtoc di nêl ên nêbê, “Ge a nug wê a xêgyaa vin lec i ge om xam ngô i vya.” <sup>8</sup> Lêc lutibed yon yê ma la wê Yesu vaci le di yuu xôa ma ge.

<sup>9</sup> He sea vigwe kitôn di lax mi la, lêc Yesu vibu yon ên nêbê, “Mon o lêc nêl wê mon wê ge kitong vô xomxo ti lêm di i loc vô buc wê a, Xomxo Nu, a obêc kidi lec vac yibên ge lê.” <sup>10</sup> Om yon hôm kiyang tige xôn mi i yêp vô yon, lêc bo ti wê Yesu nêl ên nêb ob kidi lec vac yibên ge, yon ngô lê, lêc yon o xovô kehe lêm om yon keac lec.

<sup>11</sup> Mêd yon kinêg vô Yesu ên nêbê, “Xomxo wê xovô Moses xolac gee mi nêl ên he nêbê Ilaija obêc val tax di Kilisi obêc val timuên, om he nêl tibêge ên va?” <sup>12</sup> Om Yesu nêl vô yon ên nêbê, “Vixôhilôg, Ilaija ge wê ob val mug ên vông môp yuu kiyang i vô nivîha lec lê. Lêc bêna lêc kiyang yêp vac xolac hixôn bêga nêbê Xomxo Nu obêc kô myavinê mabu di xomxo obêc yê i

nipaên di vô nimi vô i hixôn? <sup>13</sup> A nêl vô xam bê llaija val pyap, léc xomxo vông mốp nipaên vô i tiyi xovôên wê he vông ge, tiyi xobê kiyang wê plopete kivuu lec i mi i yêp vac kipihac ge.”

*Yesu tii vimwo nipaên vêl ên xomxo ti  
(Matyu 17:14-21; Luk 9:37-43)*

<sup>14</sup> Yesu hixôn nue ngivihi yon ge mîlax vô nue vihati, léc yê wê xomxo tibeac kitucma mi lam dô hixôn nue ngivihi ge, di xomxo wê xovô Moses xolac gee val dô hixôn di he hixôn Yesu nue ngivihi kinêgma lec kiyang. <sup>15</sup> Mêd xomxo vihati gee yê Yesu di yetac mabu om tup mi la vô i di la nêl vidiiên vô i. <sup>16</sup> Mêd Yesu kinêg vô nue ngivihi ên nêbê, “Xam dikeac lec kiyang vatya?” <sup>17</sup> Mêd xomxo ti kidi vac he mahigun di nêl ên nêbê, “Xolac kehe, a kô a nug vux tiga mi lam vô ông, ên vimwo nipaên dô vac i nilô om vông i dô yac di keacên ma, <sup>18</sup> di buc wê vimwo nipaên tyo ob vông yuac vac i nilô ge od hôm i xôn di nêx i lec kibun di mya ngimong lam vac mya di i kic nivu lecma, di ninivi vô xêkizêc lec. Om a kitaa nume ngivihi ên a nêb he i tii vimwo nipaên tige i loc vêl lê, léc he tiyiên ma.”

<sup>19</sup> Mêd Yesu nêl vô he vihati ên nêbê, “Xam vêx yuu vux gwêbaga, vông vinên wê xam vông ge nôn ma. Om a ob dô hixôn xam di i mîloc vô buc tina lê, léc xam vông i vinê? Di a ob kilê viyin wê xam vông ge di i mîloc buc tina lê? Loc kô num tige mi lam.” <sup>20</sup> Om he la kô nu tige mi lam vô i, léc vimwo nipaên wê dô vac nu tyo nilô ge yê Yesu om lutibed vông yuac makikun vac nu

tyo nilô di nêx i lec kibun di vông i vô liyil liyil di mya ngimong lam vac mya.

<sup>21</sup> Mêd Yesu kinêg vô nu tige ma ên nêbê, “Vimwo nipaên tige dô vac num tige tìyi klismas vaba?” Lêc xomxo tyo nêl vô Yesu ên nêbê, “Vô buc wê i gên nipwo. <sup>22</sup> Om buc tibeac vimwo nipaên nêx i la vac ngwax di nêx i la vac mia ên nêb ob hi i yib. Om a kitaa ông bê ông obêc tìyi ge od ông xo vîgwe pisiv ên xii di ngidu i xôn.” <sup>23</sup> Lêc Yesu nêl vô i ên nêbê, “Ông nêl ên ông nêbê mêd a obêc tìyi? Lêc a nêl vô ông bê xomxo ti obêc vông i vin ge od tìyi wê ob vông môt vîhati ge.” <sup>24</sup> Mêd lutibed xomxo tige nêl ên nêbê, “A vông i vin, lêc a o vông i vin xêkizêc lêm, om ông ngidu vông vinên wê a vông ge xôn.” <sup>25</sup> Yesu yê wê xomxo tibeac val dô di dival valên om nêl kiyang xêkizêc vô vimwo nipaên ên nêbê, “Ông vimwo nipaên wê ông vông xomxo tiga ninya vô kitu di keacên ma ge, a nêl vô ông bê ông lam lop mî loc vixun vêl ên nu tiga, di ông o lêc lôc mî loc vac i nilô i tìj vac lêm.” <sup>26</sup> Mêd vimwo nipaên iac mabu di hi nu tyo lec kibun sea, di sea i di lam la vêl. Mêd nu tyo yêp tipiên ma tìyi xocbê xomxo yibên om xomxo tibeac so ên nêb mêd nu tyo yib. <sup>27</sup> Lêc Yesu la hôm lec i vîgê di vông i le kisii.

<sup>28</sup> Pyap dêc Yesu lax mî la xumac lôma di lax dô hixôn nue ngivîhi lêc nue kinêg vô i ên nêbê, “Bêna lê lêc xe mô o tìyi wê xe ob tii vimwo nipaên tige vêl lêmê?” <sup>29</sup> Lêc Yesu nêl vô he ên nêbê, “Kitaaên tibed ge wê ob tii vimwo nipaên tibêge vêl, di môt baba ge ti o tìyi lêm.”

*Yesu nêl kiyang vông lu yuu lec myavinê wê ob kô ge*

*(Matyu 17:22-23; Luk 9:43-45)*

<sup>30</sup> Yesu he nue ngivihî sea vigwe tige di loc mi la vac vigwe Galili, lêc Yesu nêb xomxo i o lêc xovô vigwe wê he ob la vac ge lêm, <sup>31</sup> ên Yesu nêb ob nêl kiyang vô nue ngivihî vaci, om tixuu he ya kiyang bêga nêbê, “Xomxo ob vông Xomxo Nu la vac tibii vigê di he ob hi i yib, lêc buc yon obêc lam la vêl ge od obêc kidi lec maviha tii vac nang.” <sup>32</sup> Yesu nêl bêge lêc nue ngivihî lungên kiyang tige kehe di xona om he o kinêg kiyang tyo kehe vô Yesu lêm.

*Letya ob tu levac?*

*(Matyu 18:1-5; Luk 9:46-48)*

<sup>33</sup> He mila Kapaneam di la dô vac xumac lôma, lêc Yesu kinêg vô nue ngivihî ên nêbê, “Xam nêl kiyang vatya vôma vac môpê?” <sup>34</sup> Lêc he dô xôa maên, ên buc wê he lam vô môp ge od he ngaênma ên nêb mêd letya obêc tu he nên mugênê? <sup>35</sup> Om Yesu tô mi dô di keac nue ngivihî vigê yuu di tô mi la yuu lam vô i di nêl vô he ên nêbê, “Xomxo ti obêc nêb tu mugên ge od i loc le timuên di vông yuac wê ob ngidu lie vihati xôn ge.” <sup>36</sup> Mêd Yesu la kô nipwo ti mi lam vac he mahîgun, dêc kiva nipwo tyo lec di nêl vô nue ngivihî ên nêbê, <sup>37</sup> “Xomxo ti obêc hôm nipwo tibêga lec ên wê vông i vin a lêg ge od ge tiyi xochê

hôm a lec êno, di xomxo ti wê hôm a lec ge od o tiyi xochê hôm aca va lec lêm. Nge, hôm xomxo ti wê vông a lam ge lec hixôn êno.”

*Xomxo wê o vông vevac vô il lêm ge, tiyi xochê il nidpïpu*

*(Luk 9:49-50)*

<sup>38</sup> Jon nêl vô Yesu ên nêbê, “Xolac kehe, xe xê xomxo ti tii vïmwô nipaên vêl ên xomxo lec ông lêm, om xe vïbu i ên xe nêb i vôngên tibêge i ma, ên xomxo tige o mi dô hixôn xe mi timu vô ông lêm.” <sup>39</sup> Lêc Yesu nêl ên nêbê, “Xam o lêc vïbu i lêm, ên xomxo ti obêc vông do levac lec a lêg ge od o tiyi wê ob nêl kiyang nipaên lec a decdec ge lêm. <sup>40</sup> Ên xomxo wê o vông vevac vô il lêm ge, ge tiyi xochê il nidpïpu wê ob ngïdu il xôn ge. <sup>41</sup> A nêl hixôn nô n vô xam bê xomxo ti obêc vông mia numên vô xam ên wê xam vông i vin Kïlisi ge od xomxo tige obêc kô nô n nivïha lec timuên.

*Môp wê ob vông xomxo vô nipaên*

*(Matyu 18:6-9; Luk 17:1-2)*

<sup>42</sup> “Xomxo ti obêc vông nipwo tige ti sea vông vinên wê i vông ge di la vac môp nipaên ge od xomxo i nux ngïdax lec i kwa di nêx i loc vac gwec madia. <sup>43</sup> Di ông vigêm vïlu obêc didii ông mi la vac nipaên ge od ông kitov vêl di dô ya vigêm vilubed êdêc loc dô mamvïha vac Anutu ben. Ên ông vigêm yuu xôn obêc dô ge od ob nêx ông la vac vigwe nipaên wê ngwax tum xuhu dia di ob yib lêm ge. <sup>44</sup> [Vac vigwe nipaên tige, myel vê wê yibên obêc ma ge ob nga xomxo, di ngwax ditum hixôn di yibên ma.] <sup>45</sup> Di ông vixam vïlu obêc didii ông mi la vac môp nipaên ge od ông kitov vêl di dô ya vixam vilubed êdêc loc dô mamvïha vac Anutu ben. Ên ông vixam

yuu xôn obêc dô ge od ob nêx ông la vac vigwe nipaên. <sup>46</sup> [Vac vigwe nipaên tige, myel vêê wê yibên obêc ma ge ob nga xomxo, di ngwax ditum hixôn di yibên ma.] <sup>47</sup> Di ông mamnôn vilu obêc vông ông la vac môp nipaên ge od ông pisupac vêl di dô ya mamnôn vilubed êdêc loc dô vac Anutu ben, ên mamnôn yuu xôn obêc dô ge od ob nêx ông la vac vigwe nipaên. <sup>48</sup> Vac vigwe nipaên tige, myel vêê wê yibên obêc ma ge ob nga xomxo, di ngwax ditum hixôn di yibên ma.

<sup>49</sup> “Ngwax obêc la lec xomxo vihati tiyi xocbê xomxo hilee sol lec yaên ge. <sup>50</sup> Sol ge nivihã, léc sol obêc vô nyen maên ge od il obêc vô vatya vô ên i vô nyen i tii vac nangê? Sol i dô vac xam, di xam dô hixôn lime di xêmyaa i vin lec he.”

## 10

*Yesu nêl kiyang lec môp wê vông ii maên vô nipaên ge*

*(Matyu 19:1-12; Luk 16:18)*

<sup>1</sup> Yesu sea vigwe tige di la vac vigwe levac Judia di la vac vigwe ti wê yêp mia Jodan vilu ganê. Mêd xomxo tibeac val kitucma vô Yesu om Yesu nêl xolac vô he tiyi môp wê mi vông ila ila ge.

<sup>2</sup> Mêd Palisi ya val, nêb ob yaxên i om kinêg nêbê, “Môp wê xomxo ob sea vinê ge, xolac nêb môp tibêge tiyi, me tiyiên ma?” <sup>3</sup> Léc Yesu kinêg lax vô he ên nêbê, “Xolac wê Moses vông ge nêbê va vô xamê?” <sup>4</sup> Om he nêl ên nêbê, “Moses nêl ên nêbê xomxo ti obêc nêb sea vinê ge od ob kiyuu kipihac wê nêbê yuu ob seama ge di vông vô vinê lê dêc yuu seama.” <sup>5</sup> Léc Yesu nêl vô he



ên nêbê, “Moses kivuu xolac tige vô xam ên wê xam nîlôm yen xêkizêc ta ge. <sup>6</sup> Ên buc mugên ilage wê Anutu tung lag yuu kibun ge, od Anutu tung xomxo vêx yuu xôn vux. <sup>7</sup> Mêgem môp yêp bêga nêbê vux ob sea ta yuu ma di la dô hixôn vinê, <sup>8</sup> di yuu ob tiyi xocbê nôn tived. Om yuu ob dô tiyi xocbê nôn yuu ge lêm. Nge, yuu ob dô i tiyi xocbê nôn tived. <sup>9</sup> Mêgem môp wê Anutu vông yuu tu nôn tived ge, xomxo i o léc tax i tip lêm.”

<sup>10</sup> He lax xumac lôma léc nue ngivihi kinêg kiyang tige vô Yesu tii vac nang. <sup>11</sup> Om Yesu nêl vô he ên nêbê, “Vux ti obêc sea vinê di la kô vêx paha ngwe ge od ge vông môp yôdac vêx yuu vux. <sup>12</sup> Di vêx ti obêc sea liya di la kô vux paha ngwe ge od vêx tige vông môp yôdac vêx yuu vux.”

*Yesu kitaa lec nue nipipwo  
(Matyu 19:13-15; Luk 18:15-17)*

<sup>13</sup> Xomxo kô nue nipipwo mi la vô Yesu, ên nêb i vyax vigê lec he di kitaa lec he, léc Yesu nue ngivihi kunac he nêb he loc vôn Yesu i ma. <sup>14</sup> Léc Yesu yê môp wê nue ngivihi vông ge di xêyaa vô myavinê om nêl vô he ên nêbê, “Vông nipipwo i lam vô a di le vac xônên i ma, ên xomxo tibêgee wê tu kehe ên vigwe kisiinê. <sup>15</sup> A nêl hixôn nôn vô xam bêga bê xomxo ti obêc vông i vin Anutu xolac mi la vac i kwa ngibi tiyi xocbê nipipwo tigae lêm ge od o tiyi wê ob la dô vac Anutu ben ge lêm.” <sup>16</sup> Mêd Yesu kiva nipipwo tigege di vyax vigê lec he di kitaa lec he.

*Xomxo wê susu tibeac gee  
(Matyu 19:16-30; Luk 18:18-30)*

<sup>17</sup> Yesu loc mi la vô môm mi la, di xomxo ti tup mi la vô i vac môm, di la yev vixa kitu vô di kinêg ên nêbê, “Xolac kehe nivihã, a obêc vông bêna êdêc dô magvihã luta lêc luta?” <sup>18</sup> Lêc Yesu nêl vô i ên nêbê, “Bêna lêc ông nêl nivihã lec a? Xomxo nivihã ti o dô lêm. Anutu vaci nôn tibed wê nivihã. <sup>19</sup> Ông xovô Moses xolac pyap wê nêl ên nêbê, ‘Ông o lêc hi xomxo i yib lêm. Ông o lêc vông yôdac vêx yuu vux lêm. Ông o lêc vun xomxo ngwe susu lêm. Ông o lêc nêl kiyang kityooên lec xomxo ti lêm. Ông o lêc kityoo xomxo di vô he susu vêl lêm. Ông loc vac tam yuu mam vya kwa ngibi.’ ” <sup>20</sup> Om xomxo tyo nêl vô Yesu ên nêbê, “Xolac kehe, buc wê a gên nipwo di i val tyip gwêbaga, a viac xolac gee vîhati mi vông i vô nôn lec.” <sup>21</sup> Mêd Yesu yê i manôn di xêyaa vin lec i, mêd nêl vô i ên nêbê, “Môm ti gên yêp wê ông ob vông hixôn ge. Ông loc vông susu wê ông vông ge vîhati mi tibii i kisuu, di ông vông mone vô xomxo wê nêl susu maên ge, ên ông obêc vông bêge ge od ông obêc kô susu nôn nivihã gê kisii ganê. Ông loc vông bêge di lôm timu vô a vixag.” <sup>22</sup> Xomxo tyo ngô kiyang tige di nilô vô vîyin levac ên i susu tibeac. Om sea Yesu di la.

<sup>23</sup> Mêd Yesu manôn yê nue ngivihã di nêl vô he ên nêbê, “Xomxo wê susu tibeac ge obêc nêb la vac Anutu ben ge od obêc vông yuac levac vô he.” <sup>24</sup> Yesu nue ngivihã ngô kiyang tige di yetac mabu. Lêc Yesu nêl tii vac vô he ên nêbê, “Xam

nuge, xomxo obêc nêb la vac Anutu ben ge od yuac levac. <sup>25</sup> Bwoc kamel obêc la vac yin kitu tocên ge, od obêc yuac levac, di

xomxo wê susu tibeac ge obêc nêb la vac Anutu ben ge od obêc yuac levac luu vêl.” <sup>26</sup> Om Yesu nue ngivihî yetac mabu yocên di nêl vô i ên nêbê, “Obêc tibêge ge od letya tiyi wê obêc la dô mavîha vac Anutu ben ge?” <sup>27</sup> Lêc Yesu yê manôn la bôbac vô he di nêl ên nêbê, “Xomxo vaci o tiyi lêm, dom Anutu vaci ge od tiyi pyap. Ên môp vihati yang ge, Anutu tiyi wê ob vông ge.”

<sup>28</sup> Mêd Pita nêl vô Yesu ên nêbê, “Om wê lê. Xe ga, xe sea susu wê xe vông ge vihati dô di lam timu vô ông vixam.” <sup>29</sup> Mêd Yesu nêl ên nêbê, “A nêl hixôn nô n vô xam bêga bê xomxo ti obêc sea ben hixôn tae mae lie di nue hixôn yuac yaên wê i vông ge ên wê nêb ob vông a lêg yuu xolac i vô levac ge, <sup>30</sup> od xomxo tige obêc kô xumac hixôn yuac yaên tibeac di tae mae lie di nue tibeac gê kibun ga, lêc tibii obêc vông myavinê vô i hixôn, di buc timuên ge od obêc la dô mavîha luta lêc luta. <sup>31</sup> Lêc xomxo mugên tibeac obêc lax mî la timu, di xomxo timuên tibeac obêc lam la mug.”

*Yesu nêl kiyang vông lu yon lec myavinê wê ob kô ge*

*(Matyu 20:17-19; Luk 18:31-34)*

<sup>32</sup> Yesu he nue ngivihî loc mî la ên nêb ob la Jelusalem. Om he mîla vac môp, lêc Yesu la mug di nue ngivihî hixôn xomxo ya he timu vô i vîxa. Mêd nue ngivihî xo kiyang tibeac, di xomxo wê la hixôn gee, he xona. Mêgem Yesu kô nue ngivihî

vigê yuu di tô mi la yuu mi he la dô viyonên di Yesu nêl viyin wê ob tulec i ge kitong vô he, <sup>33</sup> om nêl ên nêbê, “Xam ngô lê. Il ob la Jelusalem, di xomxo ob vông Xomxo Nu vac xomxo levac wê mi si daa gee hixôn xomxo wê xovô Moses xolac gee vigê, di he ob vông kot vô i di hilu kiyang wê ob hi i yib ge xôn di vông i la vac tibii wê o Yuda lêm gee vigê, <sup>34</sup> mêd tibii tigege ob so vya vô i di pisuv mya lec di pisa ya yihi di hi i yib, di buc yon obêc lam la vêl ge od obêc kidi lec maviha nang.”

*Jems yuu Jon nêb yuu ob tu levac  
(Matyu 20:20-28)*

<sup>35</sup> Sebedi nu yuu Jems yuu Jon la vô Yesu di nêl vô ên nêbê, “Xolac kehe, xii ob kitaa susu ti vô ông, ên ông vông vô xii.” <sup>36</sup> Om Yesu nêl vô yuu ên nêbê, “Om muu nêb a vông bêna vô muuê?” <sup>37</sup> Mêd yuu nêl vô i ên nêbê, “Buc wê ông ob dô vac xêseac ge, od xii nêb ông vông lê levac vô xii di xii ngwe ob dô vô ông vigêm vilu hiyôv di ngwe ob dô vô vigêm vilu kêd.” <sup>38</sup> Lêc Yesu nêl vô yuu ên nêbê, “Susu wê muu kitaa vô a ge muu o xovô kehe lêm. Di kap wê a ob num vac ge, muu tiyi wê muu ob num vac hixôn, me? Di mia lipacên wê a ob lipac ge, muu tiyi wê muu ob lipac hixôn, me? Ên myavinê levac hixôn viyin obêc hivun a xôn.” <sup>39</sup> Mêd yuu nêl vô Yesu ên nêbê, “Xii tiyi pyap.” Lêc Yesu nêl vô yuu ên nêbê, “Vixôhilôg, myavinê wê a ob kilê ge, muu ob kilê hixôn. Di viyin wê a ob tulec ge, obêc tulec muu êno hixôn. <sup>40</sup> Lêc xomxo wê ob kê lê levac mi dô vô a vigêg hiyôv di dô vô a vigêg kêd

ge, a o tiyi wê a ob nêl ge lêm. Ên Anutu vaci ob nêl xomxo wê i viac vigwe pyap vô he ge.”

<sup>41</sup> Yesu nue ngivihi vigê yuu ngô kiyang wê Jems yuu Jon nêl ge om he xêyaa vô myavinê vô yuu. <sup>42</sup> Om Yesu keac he vihati la vô i di nêl vô he ên nêbê, “Xam xovô ên xam nêbê xomxo wê tu tibii baba nêl levac ge, he mi yong he ên lê levac wê he kô ge, di he mi nêl kiyang xêkizêc vô lie ên nêb he i loc vac kiyang wê he nêl ge kwa ngibi. <sup>43</sup> Di xacxam va, xam o lêc vông môm tibêge lêm. Xam ti obêc nêb tu xam nêl levac ge, od i tu xam nêl xomxo yuac. <sup>44</sup> Di xam ti obêc nêb tu xam nêl mugên ge od i kô lê vidaaên di vông yuac vô lie vihati. <sup>45</sup> Ên a, Xomxo Nu, a o lam ên a nêb xomxo i vông yuac vô a lêm. Nge, a lam ên a nêb a ob vông yuac vô xomxo ên ngidu he xôn, di a ob xib ên vô xomxo tibeac vêl ên he nêl nipaên.”

*Yesu vông xomxo ma tocên ti vô nivîha lec  
(Matyu 20:29-34; Luk 18:35-43)*

<sup>46</sup> Yesu he nue ngivihi hixôn xomxo tibeac ge, he val Jeliko, nang dêc sea Jeliko di la nang. Lêc xomxo matocên ti lê nêbê Batimias wê ma Timias ge dô vô môm ninya, ên mi dô di mi kitaa mone vô tibii wê lam vô môm ge. <sup>47</sup> Lêc ngô wê Yesu Nasalet val ge, om tyuc vya levac bêga nêbê, “Yesu, Devit nu, ông xo vigwe pisiv ên a.” <sup>48</sup> Mêd xomxo tibeac higac di nêl ên nêbê, “Ông vyam i ma.” Lêc Batimias ngôên he ma di tyuc vya levac tii vac vac ên nêbê, “Devit nu, ông xo vigwe pisiv ên a.” <sup>49</sup> Mêgem Yesu val le di nêl ên nêbê, “Xam keac i lam.” Om he la nêl vô Batimias ên

nêbê, “Ông xêmyaa i vô nivuha di ông kidi lec mi lam, ên Yesu nêl nêb ông loc vô i.” <sup>50</sup> Om Batimias kwax i kol siot vêl di kidi lec lutibed di la vô Yesu. <sup>51</sup> Mêd Yesu kinêg vô i ên nêbê, “Ông nêb a vông bêna vô ôngê?” Lêc xomxo ma tocên tige nêl vô i ên nêbê, “Xomxo levac, a nêb ông vông a magnôn i seac.” <sup>52</sup> Mêd Yesu nêl vô i ên nêbê, “Om ông lôc, ên vông vinên wê ông vông ge vông ông vô nimviha lec.” Om lutibed xomxo tyo manôn seac di i yê vîgwe mêd la hixôn Yesu mi he la.

## 11

*Yesu la vac vîgwe Jelusalem tiyi xocbê xomxo levac ge*

*(Matyu 21:1-11; Luk 19:28-40; Jon 12:12-19)*

<sup>1</sup> Yesu he nue ngivihî loc mi la ên nêb ob la Jelusalem. He la vac vîgwe Betpasi yuu Betani wê yêp kwabo vô kitôn Oliv ge. Vîgwe yuu ge yêp kwabo vô Jelusalem. Om Yesu vông nue ngivihî yuu la, <sup>2</sup> di nêl vô yuu ên nêbê, “Muu loc vac vîgwe ti wê yêp vilu ganê. Wê muu obêc mila ge od muu ob wê donki wê gên ligên ge ti wê xomxo vô yihî lec kwa di i dîle ge. Donki tige xomxo ti gên o dô lec ila lêm. Om muu piwelac yihî vêl ên di didii i mi lam. <sup>3</sup> Lêc xomxo ti obêc kinêg muu ên nêbê, ‘Muu ob piwelac yihî tige vêl ên va?’ ge od muu nêl vô bê ‘Apumtau nêb ob kô mi vông yuac lec di obêc vông i lôm lutibed.’ ”

<sup>4</sup> Yesu nêl bêge vô yuu di yuu loc mi la, di mila yê bwoc donki ti wê xomxo ku xôn di ku lec xumac ti vuayen di i dîle kwabo vac môp ge,

mêd yuu piwelac yihi vêl, <sup>5</sup> lêc xomxo wê dile ge nêl vô yuu ên nêbê, “Bêna lêc muu dipiwelac yihi vêl ên donki tige?” <sup>6</sup> Om yuu nêl i tiyi kiyang wê Yesu nêl vô yuu ge, mêd xomxo tige tyuc lec, <sup>7</sup> om yuu didii donki tige mi lax vô Yesu, mêd yuu vax yuu ngakwi lec kisii dêc Yesu dô lec. <sup>8</sup> Mêd xomxo tibeac vax he nivimihi lec môp di he ya kô xax lihi wê he la kô vac yuac ge mi vax vac môp wê Yesu ob xoc vô ge. Môp tige wê he mi kô xomxo levac lec ge. <sup>9</sup> Mêgem he wê la mug hixôn he wê timu vô Yesu gee, he vihati tyuc ên nêbê,

“Il ob pimil Anutu. Di il ob hi vixad i pec ên xomxo ti wê tu Apumtau manôn mi val ge.

<sup>10</sup> Il ob hi vixad ên il nêd king wê val gwêbaga, ên ob viac il tiyi xocbê bug Devit viac il ilage. Il ob vông Anutu lê i vô levac di i yêp kisii.”

<sup>11</sup> Mêd Yesu mila Jelusalem di la vîlee vac Anutu xumac ngibua mi la yê susu vihati ge pyap, mêd hiyôv hoo la di vigwe ob buc, om Yesu hixôn nue ngivihi vigê yuu di tô mi la yuu, he lax mi la vigwe Betani.

*Yesu nêl vya lôl hîguc nêb i vuac nôl lêm  
(Matyu 21:18-19)*

<sup>12</sup> Vigwe vidiiên titige Yesu he nue ngivihi sea Betani di la, lêc vip den Yesu. <sup>13</sup> Om Yesu yê ma la hîguc ti wê le teva ge di lihi levac om la kwabo ên nêb ob yê bêc nôl ya yux lec ge od ob ya. Om la yê, lêc lihi pileva di nôl ti o yux lec lêm, ên buc wê nôl ob yux lec ge gên yêp. <sup>14</sup> Om Yesu nêl kiyang xêkizêc lec hîguc ên nêbê, “Tiyi buc

vihati yang ge ông ob vuac nôñ ti i tii vac lêm.”  
Yesu nêl bêge ði nue ngivihî ngô hixôn.

*Yesu tii tibii wê vông vitevac vac Anutu xumac ngibua gee la vêl*

*(Matyu 21:12-17; Luk 19:45-48; Jon 2:13-22)*

<sup>15</sup> He mila Jerusalem mêd Yesu la vac Anutu xumac ngibua ði la tii xomxo wê ðivông vitevac gee la vêl, ði xomxo wê vông mone luuma gee, Yesu kipyax he nêñ tevol sea, ði xomxo wê vông vitevac lec menac gee, Yesu kipyax he nêñ sia sea, <sup>16</sup> ði Yesu vibu xomxo nêb he i o lêm kilê he susu mi loc vac xumac ngibua lêm. <sup>17</sup> Mêd

Yesu nêl vô he êñ nêbê, “Anutu vya yêp vac xolac bêga nêbê, ‘Xumac wê a vông ge, xomxo vac vigwe vihati gee, he ob kitaa vac.’ Xolac nêl bêge, lêm xam vông i tu xochê xumac wê tibii yôðac ob xôpac vac ge.”

<sup>18</sup> Mêd xomxo levac wê mi si daa gee hixôn he wê xovô Moses xolac gee ngô kiyang tige om myag môp wê ob hi Yesu yib lec ge, lêm he xona êñ Yesu êñ wê xomxo vihati yetac êñ kiyang wê Yesu nêl ge. <sup>19</sup> Yesu he nue ngivihî ðô ði vigwe buc om he sea Jerusalem ði lax mi la Betani.

*Kitaaên wê xomxo vông vinên vông ge ob vô nôñ lec*

*(Matyu 21:20-22)*

<sup>20</sup> Vigwe vidiên titige, he lax mi la Jerusalem lêm yê wê higuc tige lihi yal vêl ði mupac vac kitôn ði i la tô kehe. <sup>21</sup> Mêd Pita xovô kiyang wê Yesu nêl vihevage om nêl vô i êñ nêbê, “Xolac kehe, wê lê. Xax ti wê ông nêl vyam lôñ vihevage, tyo mupac.” <sup>22</sup> Lêm Yesu nêl vô he êñ nêbê, “Xam



vông i vin Anutu. <sup>23</sup> A nêl hixôn nôn vô xam bêga bê xomxo ti obêc nêl vô kitôn tige bê i pul vêl mi loc vac gwec, di xomxo tige nêlô ob vông yuu lêm, nge, obêc vông i vin xêkizêc ên nêbê kiyang wê i nêl ge ob vô nôn lec ge od ob vô nôn lec. <sup>24</sup> Om a nêl vô xam bêga bê xam obêc nêb kitaa susu ti vô Anutu ge od xam vông i vin xêkizêc bê xam obêc kô susu tige, ên xam obêc vông bêge ge od xam obêc kô i tiyi wê xam kitaa ge.

<sup>25</sup> “Di buc wê xam ob kitaa vô Anutu ge od lime ti nêl soên obêc yêp vô xam ge od xam kitya nipaên tige vêl lê, êdêc Mag wê dô lag puunê ge i kitya xam nêl nipaên vêl hixôn. <sup>26</sup> [Lêc xam obêc kitya lim tige nêl nipaên vêl lêm ge od Mag wê dô kisiinê ge obêc kitya xam nêl nipaên vêl êno lêm.]”

*Xomxo kinêg xêkizêc wê Yesu vông ge kehe  
(Matyu 21:23-27; Luk 20:1-8)*

<sup>27</sup> Yesu he nue ngivihî milax Jêlusalem tii vac, mêd Yesu la vîlee vac Anutu xumac ngîbua lêc xomxo levac wê mi si daa gee hixôn xomxo wê xovô Moses xolac gee hixôn he Yuda levac levac, he val vô Yesu, <sup>28</sup> di val kinêg vô i ên nêbê, “Letya vông ông lam ên nêb ông lam vông môp tibêgee? Ông tu letya manôn di vông môp tibêge?” <sup>29</sup> Lêc Yesu luu he vya di nêl lax vô he ên nêbê, “A êno ob kinêg kiyang ti vô xam, di xam obêc nêl kitong ge od a ob nêl xomxo ti wê vông a lam ge kitong vô xam. <sup>30</sup> Om a ob kinêg xam bêga bê môp wê Jon Lipacên lipac xomxo ge, môp tige kehe yêp vô letya? Ge yêp vô Anutu

lag kisiinê, me yêp vô xomxo kibun ga? Xam nêl kehe kitong vô a.”

<sup>31</sup> Om he ngaênma di nêl vôma ên nêbê, “Il obêc nêb va? Ên il obêc nêl bê Anutu lag kisiinê vông Jon lam ge od Yesu obêc nêl vô il bê, ‘Bêna lêc xam o vông i vin kiyang wê Jon nêl ge lêmê?’

<sup>32</sup> Lêc il obêc nêl bê xomxo kibun ga vông Jon la lipac xomxo ge od tiyiên ob ma.” He nêl bêge, ên he xona ên xomxo, ên xomxo vihati vông i vin ên he nêbê Jon ge plopet nôn. <sup>33</sup> Mêgem he nêl vô Yesu ên nêbê, “Xe o xovô lêm.” Mêd Yesu nêl vô he ên nêbê, “Om a êno ob nêl xomxo ti wê vông xêkizêc vô a ge kitong vô xam lêm.”

## 12

*Kiyang pilepacên lec xomxo nipaên wê viac yuac ge*

*(Matyu 21:33-46; Luk 20:9-19)*

<sup>1</sup> Mêd Yesu nêl kiyang pilepacên ti vô xomxo bêga ên nêbê, “Xomxo ti xin wain vac yuac di ku xenac kisuu lec di yev lôva ti wê xomxo ob gig xax nôn vac ge di lox xumac wê xomxo ob dô vac di viac yuac ge. Mêd xomxo tige nêb ob la dô vac vîgwe teva ngwe, om vông yuac tige vac xomxo ya vîgê ên nêb he i viac. Pyap di xomxo tige la dô teva ngwe, <sup>2</sup> di buc wê wain huu ge om vông nue yuac ti lax mi la vô xomxo wê viac yuac wain ge ên nêb i loc kô wain nôn ya. <sup>3</sup> Xomxo tyo mila, lêc xomxo wê vông yuac lec wain ge hôm i xôn di hi i di vông i lax mi la pileva. <sup>4</sup> Nang dêc xomxo ti wê i yuac ge vông nue yuac ngwe la vô he nang, lêc he hi i lec bazub di vô vya nipaên vô i di vông

i lax mi la nê. <sup>5</sup> Mêd xomxo levac vông nu yuac ti wê vông yon ge la nang, lêc xomxo tige hi i yib. Mêd xomxo tyo vông nue yuac toto la lêc he hi he ya vô nipaên di hi he ya yib. <sup>6</sup> Mêd xomxo tibed dô hixôn xomxo levac tige. Ge i nu tuc wê i xêyaa vin lec i ge om buc ti lêc xomxo levac tyo vông nu tuc la vô xomxo wê viac i yuac ge, ên nêl ên nêbê, 'Ga aca va nug om he ob kô i lec nivaha di la vac kiyang wê i vông ge kwa ngibi.' <sup>7</sup> Lêc xomxo wê viac yuac tige nêl vông ên nêbê, 'Xomxo tige wê obêc tu yuac kehe om il ob hi i yib êdêc yuac ga i tu il xe.' <sup>8</sup> Om he hêm i xôn di hi i yib, di nêx i nôn la yêp vô yuac ninya.

<sup>9</sup> "Om xomxo ti wê i yuac ge ob vô vatya? Ge ob la hi xomxo tige yib di vông i yuac vô xomxo baba mi he viac nang.

<sup>10</sup> "Kiyang wê yêp vac Anutu xolac ge xam mêd o kitong lêm? Ên kiyang yêp bêga nêbê, 'Ngidax ti wê xomxo xumac loxên yê lêc nêbê tiyiên ma ge, ge wê tu ngidax xêkizêc wê ob hêm xumac xôn ge. <sup>11</sup> Apumtau vaci vông tige om xe xê tiyi xochê susu nivaha yang ge.' "

<sup>12</sup> Xomxo levac wê mi si daa gee hixôn xomxo wê xovô Moses xolac gee, he xovô ên he nêbê Yesu nêl kiyang pilepacên tige lec he, om he nêb he ob hêm Yesu xôn, lêc he xona ên xomxo tibeac, om he sea Yesu di la.

*Xomxo kinêg Yesu lec mone wê ob tung vô Sisa  
ge  
(Matyu 22:15-22; Luk 20:20-26)*

<sup>13</sup> He vông Palisi ya hixôn Helot nue ya la vô Yesu ên nêb ob kityoo Yesu ên vông i nêl kiyang ya i so. <sup>14</sup> Om he val nêl vô i ên nêbê, “Xolac kehe, xe xovô ên xe nêbê ông ge wê ông nêl kiyang hixôn nô n di ông o xona ên xomxo ti lêm, ên ông wê xomxo vihati tiyima, om ông mi nêl kiyang nô n di ông tixuu xomxo vihati ya kiyang wê Anutu vông ge. Om xe nêb xe ob kinêg vô ông bê tiyi wê il Yuda ob vông mone takis vô king Sisa ge, me il vôngên ob ma?”

<sup>15</sup> Lêc Yesu xovô kiyang kityooên wê yêp vac he nîlô ge om nêl vô he ên nêbê, “Bêna lêc xam nêb xam ob yaxên a? Xam kô mone ti mi lam ên a xê.” <sup>16</sup> Om he kô mone ti mi lam, di Yesu kinêg vô he ên nêbê, “Letya kinu yuu lê wê yêp lec mone tiga?” Om he nêl ên nêbê, “Sisa kinu yuu lê.” <sup>17</sup> Mêgem Yesu nêl vô he ên nêbê, “Om susu wê Sisa xe ge, xam vông i loc vô Sisa, di susu wê Anutu xe ge, xam vông i loc vô Anutu.” Mêd xomxo tigege ngô kiyang wê Yesu nêl ge di yetac mabu.

*He kinêg vô Yesu lec môp wê xomxo ob kidi lec vac yibên ge*

*(Matyu 22:23-33; Luk 20:27-40)*

<sup>18</sup> Xomxo Sadyusi ya val vô Yesu. He Sadyusi ge, he vông i vin ên he nêbê xomxo ob kidi lec vac yibên lêm. Om he la nêl vô Yesu ên nêbê, <sup>19</sup> “Xolac kehe, Moses xolac nêl bêga vô il ên nêbê xomxo ti obêc kô vêx ti lêc nu ma di liya yib di vinê dô ge od vux tyo li timuên ob ii vêx tyo nang di vông nue, êdêc nue i tu susu wê ma yibên vông ge kehe. Moses xolac nêl bêge, <sup>20</sup> om wê

vux vigê vilu di sec yuu ob dô lec ta yuu ma tived, dêc li tuc obêc kô vêx ti lêc yib di nu ma ge, <sup>21</sup> od li môn ob ii vêx tige i tii vac nang, lêc wê obêc yib di nu ma ge od li gwaa ob ii nang, lêc wê li gwaa obêc yib ge <sup>22</sup> od lie timuên vihati ob timu vô môm tived ge dêc ii vêx tige, lêc wê vihati obêc yib di nue ma, dêc vêx tyo obêc yib timuên. <sup>23</sup> Om xe nêb xe ob kinêg vô ông bê buc wê xomxo yibên obêc kidi lec ge od vêx tige obêc tu vux tina vinê? Ên vux vigê vilu di sec yuu, he xôn ii vêx tived lec buc wê he dô maviha ge.”

<sup>24</sup> Lêc Yesu nêl vô he ên nêbê, “Xam nêl i so di kehe bêga nêbê xam o xovô kiyang wê yêp vac xolac ge lêm, di xam o xovô xêkizêc wê Anutu vông ge lêm. <sup>25</sup> Ên buc wê xomxo obêc kidi lec maviha vac yibên ge, vêx yuu vux ob iima vô buc tige lêm. Nge, he ob dô tiyi xocbê angela lag puunê ge.

<sup>26</sup> “Di kiyang lec môm wê xomxo yibên ob kidi lec maviha ge, xam mêd lungên kiyang bo ti wê Moses kivuu lec xax wê ngwax ditum lec ge? Vac kiyang tige Moses kivuu Anutu vya wê nêl vô i ge mi i yêp vac kipihac xolac bêga nêbê, ‘A ga, Anutu wê Eblaham yuu Aisak yon Jekop mi kitaa vô a.’ <sup>27</sup> Om kiyang tige nêl kitong ên nêbê Anutu o tu xomxo yibên nêl Anutu lêm. Nge, Anutu tu xomxo maviha nêl Anutu. Om kiyang wê xam nêl ên xam nêbê xomxo ob kidi lec vac yibên lêm ge, xam nêl i so.”

*Xolac yuu wê nginoo xolac baba vêl ge  
(Matyu 22:34-40; Luk 10:25-28)*

<sup>28</sup> Xomxo wê xovô Moses xolac ge ti val ngô wê he ngaênma lec kiyang ge di ngô wê Yesu luu he kiyang ya kiyang nivihha ge, om kinêg vô Yesu ên nêbê, “Xolac wê Anutu nêl vô Moses ge, tina wê nginoo xolac baba vêl ge? <sup>29</sup> Om Yesu nêl vô i ên nêbê, “Xolac ti wê yêp tax di nginoo baba vêl ge bêga nêbê, ‘Xam xomxo Islel, xam ngô lê. Il Apumtau Anutu, i Apumtau tibed. <sup>30</sup> Ông xêmyaa i vin lec ông Apumtau Anutu di ông vông nilôm yen yuu piyôp di xêkizêc hixôn kinum i loc diluhu vô Anutu.’ <sup>31</sup> Di xolac ti wê vông yuu ge yêp bêga nêbê, ‘Ông xêmyaa i vin lec xomxo baba i tiyi xocbê ông xêmyaa vin lec ôcông va ge.’ Xolac baba ti o nginoo xolac yuu ge vêl lêm.”

<sup>32</sup> Mêd xomxo tige nêl vô Yesu ên nêbê, “Xolac kehe, ông nêl ge nivihha. Ông nêl kiyang nô nêl ên ông nêbê Anutu ge tibed di ngwe o dô hixôn i lêm. <sup>33</sup> Om il xêdyaa ob vin lec i di il ob vông nilôd yuu piyôp hixôn xêkizêc vihati i loc diluhu vô Anutu, di il xêdyaa ob vin lec xomxo baba tiyi xocbê il xêdyaa vin lec icil va ge, ên il obêc vông bêge ge od ob nivihha luu daa wê xomxo mi si lec ngwax hixôn daa baba ya vêl.”

<sup>34</sup> Mêd Yesu ngô wê xomxo tige nêl kiyang hixôn piyôp nivihha ge om nêl vô i ên nêbê, “Ông o dô teva ên Anutu ben kisiinê lêm.” Mêd xomxo vihati xona ên wê ob kinêg kiyang ya vô Yesu nang ge.

*Yesu kinêg lê Kilisi vô he  
(Matyu 22:41-46; Luk 20:41-44)*

<sup>35</sup> Yesu la nêl xolac vô xomxo vac Anutu xumac ngibua di nêl bo ti hixôn bêga nêbê, “Bêna léc xomxo wê xovô Moses xolac ge nêl ên he nêbê Kilisi wê Anutu nêb ob vông i lam ge, ge Devit nu? <sup>36</sup> Ên Myakilôhô Ngibua vông xovôên vô Devit om Devit vaci kivuu kiyang bêga nêbê, ‘Apumtau Anutu nêl vô a Apumtau ên nêbê, Ông dô vô a vigêg hiyôv di a obêc vông tibii wê vông vevac vô ông ge he i dô vac ông kwa ngibi.’

<sup>37</sup> Om kiyang tige, Devit vaci nêl lec Kilisi ên nêbê i Apumtau. Om bêna léc xomxo nêl ên nêbê Kilisi ge Devit bue timuên ti?” Mêd xomxo tibeac nêb ob ngô kiyang wê Yesu mi nêl ge.

*Yesu nêl xomxo wê xovô Moses xolac gee nêl nipaên kitong*

*(Matyu 23:1-36; Luk 11:37-54; Luk 20:45-47)*

<sup>38</sup> Yesu nêl kiyang vô xomxo bêga ên nêbê, “Xam xona nêl ên xomxo wê xovô Moses xolac gee, ên he xêyaa vin lec môp wê he ob vinyum ngakwi dia di la vilee lec wetôv, ên he nêb xomxo i yê he di kô he lec, <sup>39</sup> di he obêc la vac xumac lilo, me he ob la ya vizid levac ge, od he nêb he ob dô lec sia nivîha wê xomxo levac mi dô lec ge. <sup>40</sup> Léc he mi vô xomxo vêxôv nêl susu yuu xumac vêl ên he, di buc wê he ob kitaa ge od he vîyum nêl nipaên vac kitaaên dia. Om he ob kô myaviwen levac mabu luu vêl.”

*Vêxôv ti vông daa vô Anutu ge*

*(Luk 21:1-4)*

<sup>41</sup> Yesu dô kwabo vô kilong wê xomxo mi tung mone daa vac ge di yê wê xomxo tibeac lam tung

mone vac ge. Mêd xomxo wê mone levac gee he lam tung mone levac vac kilong, <sup>42</sup> mêd vêxôv wê nêl mone ma ge ti val tung mone hi yuu tya vac kilong. <sup>43</sup> Mêd Yesu keac nue ngivihi lam vô i di nêl vô he ên nêbê, “A ob nêl hixôn nôl vô xam bê mone hi nôl yuu tya wê vêxôv tiga lam tung vac kilong ge nginoo mone wê xomxo baba lam tung ge vêl. <sup>44</sup> Ên he mone levac dô, lêc he lam tung viwen di he xe levac dô, di vêxôv tiga, i nêl mone ma lêc lam tung mone yuu tya wê i vông ge la vac kilong, di ti o dô wê ob kisuu xen yaên lec mi ya ge lêm.”

## 13

*Yesu nêl lec viyin wê ob val timuên ge  
(Matyu 24:1-14; Luk 21:5-19)*

<sup>1</sup> Yesu lop vac Anutu xumac ngibua ên nêb ob la, lêc nue ngivihi ti nêl vô i ên nêbê, “Xolac kehe, xumac tigae, nivihha yang di tibii lox ya ngidax nivihaviha.” <sup>2</sup> Lêc Yesu nêl vô i ên nêbê, “Xumac levac wê xam diwê ga, a nêl vô xam bê obêc buc timuên ge od ngidax tigae, ngwe ob dô lec ngwe kisii lêm. Ên tibii ob dii di nêx sea.”

<sup>3</sup> Mêd Yesu la dô lec kitôn Oliv wê yuu xôn Anutu xumac ngibua le tiyima ge, lêc Pita yuu Jems di Jon yuu Andlu mila vô Yesu di heche va dô, di he kinêg vô Yesu ên nêbê, <sup>4</sup> “Xe nêb ông nêl vô xe bê kiyang wê ông nêl lec xumac ngibua ge obêc vô nôl lec yelacna? Di do tina wê obêc val vô xe tax ên xe xê di xovô bê kiyang tige obêc vô nôl lecê?”

<sup>5</sup> Mêgem Yesu nêl vô he ên nêbê, “Xam viac xam nivihha êdêc xomxo i o lêc kityoo xam lêm.



<sup>6</sup> Ên xomxo tibeac obêc val nêl a lêg di nêl bêga nêbê he Kilisi om obêc kityoo xomxo tibeac.

<sup>7</sup> “Di xam obêc ngô kiyang wê nêbê vevac tyip vac vigwe ya mi xomxo hima ge od le i lêc yetac di xona lêm. Ên vevac tige obêc val, lêc ge o buc myahipu tyo lêm. Nge, buc tyo gên yêp. <sup>8</sup> Ên tibii viyang ngwe ob vông vevac vô viyang ngwe, di tibii viyang viyang ob dô kidu kidu di vông vevac vômá, di ngiyêg ob yoc vac vigwe ya di vip ob den xomxo vac vigwe ya. Om viyin tige wê ob val taxlee vô xomxo lêc viyin tibeac gên yêp wê ob val timuên.

<sup>9</sup> “Xacxam va viac xam nivîha, ên xomxo obêc hóm xam xôn di vông xam la le kot vô kaunsil manôn, di he ob hi xam vac xumac lilo nilô, di he ob vông xam la le vô king hixôn gavman levac manôn mi he vông kot vô xam ên wê xam vông i vin a ge, om xam ob nêl a xolac kitong vô he.

<sup>10</sup> Ên xomxo vihati ob ngô xolac pyap lê, dêc buc myahipu ob val timuên. <sup>11</sup> Mêd buc wê he obêc hóm xam xôn di vông xam la vac kot ge od le i lêc xona di nêl bê ‘Xe ob nêl kiyang bêna vô he?’ lêm. Buc wê xam ob la le vô he manôn ge od xam nêl i tiyi kiyang wê Myakilôhò Ngibua ob vông vô xam vô buc tige, ên kiyang wê xam ob nêl ge obêc tiyi xobê xacxam va kiyang ge lêm. Nge, ge kiyang wê Myakilôhò Ngibua vông vô xam ge.

<sup>12</sup> Vô buc tige xomxo ya obêc vông heche va lie la vac tibii vigê ên nêb tibii i hi he yib, di mae obêc vông heche va nue vô tibii bêge êno, di nue obêc yê tae mae nipaên di vông he vac tibii vigê di tibii obêc hi he yib. <sup>13</sup> Mêd xomxo vihati obêc yê xam nipaên ên wê xam vông i vin a lêg ge. Di

xomxo ti obêc le xêkizêc vac vông vinên di i la tyip vô buc myahipu ge od Anutu obêc vông i la dô vac i ben.

*Nipaên nôn obêc val timuên  
(Matyu 24:15-28; Luk 21:20-24)*

<sup>14</sup> “Obêc buc timuên ge, susu nipaên nôn wê ob vông vîgwe vô nipaên ge obêc la le vac vîgwe ngîbua ti wê xomxo vibu nêbê susu nivîha pileva ob le vac ge. (Xam wê xam kitong kiyang tiga, xam xovô kiyang tiga kehe lê.) Di buc wê susu tige obêc val le seac ge od xomxo wê dô vac vîgweJudia ge, he i pec mi loc lec vîgwe kitôn,  
<sup>15</sup> om he wê dô lec xumac kisii ge he i o léc lop mi lax kô susu ti vac xumac nîlô lêm, <sup>16</sup> di he wê dô vac yuac lôma ge he i o léc pop mi lax kô vinyumên ti hixôn lêm. <sup>17</sup> Di vêx wê nu dô vac xêyaa hixôn vêx wê vông lul vô nue ge, he ob dô vac vîyin levac vô buc tige. <sup>18</sup> Mêgem xam kitaa vô Anutu bê vîyin tige i o léc val vô buc wê lun yuu ningigooên ge lêm, <sup>19</sup> ên vîyin wê ob val vô buc tige obêc levac mabu yocên luu vîyin baba vîhati vêl. Ên buc mugên ilage wê Anutu tung susu vîhati ge di i val vô buc gwêbaga, hixôn buc wê ob val timuên ge, vîyin tulec xomxo, léc o tiyi xocbê vîyin wê a nêl ga lêm. <sup>20</sup> Vîyin tige obêc levac mabu, léc Anutu obêc xovô xomxo wê i vinoo pyap nêb he tu ixê ge om ob tax buc tige tip myabo. Ên buc obêc yêp dia ge od vîyin tige obêc kitya xomxo vîhati vêl.

<sup>21</sup> “Vô buc tige xomxo ti obêc nêl vô xam ên nêbê, ‘Xam wê lê. Kîlisi dô ga,’ me obêc nêl bêga nêbê, ‘Kîlisi dô ganê’ ge od xam o léc vông

i vin lêm. <sup>22</sup> Ên xomxo kityooên ya obêc val nêbê he Kîlisi me he plopete, di he ob vông do levac hixôn do toto wê xomxo ob yetac ên ge di pilepac xomxo nîlô la vô kiyang kityooên wê he nêl ge, om obêc tiyi ge od obêc kityoo xomxo wê Anutu vînoo he pyap ge ya hixôn. <sup>23</sup> Mêgem xam xona ên xam di viac xam nivîha, ên kiyang wê ob vô nôn lec timuên ge a nêl vîhati kitong yêp seac vô xam.

*Buc wê Xomxo Nu ob vena ge  
(Matyu 24:29-31; Luk 21:25-28)*

<sup>24</sup> “Viyin levac tige obêc tip la vêl, nang dêc hiyôv yuu dentuc ob vô mapitoc di linacên obêc ma, <sup>25</sup> di pitua lag puunê obêc tô sea mi lam, di susu xêkizêc wê kisii ganê ge ob vô yocycoc mi la di lôm. <sup>26</sup> Mêd vô buc tige xomxo ob yê Xomxo Nu ob lam vac viyobtoc hixôn xêseac yuu xêkizêc levac di lam. <sup>27</sup> Mêd a ob vông angela loc vac vigwe vîhati di i loc tiyi kibun yuu lag myahîpu di loc vilu vô xomxo wê Anutu vînoo he pyap ge vîhati.

*Kiyang pilepacên lec xax wê mi pwoc ge  
(Matyu 24:32-35; Luk 21:29-33)*

<sup>28</sup> “Xam xovô kiyang lec xuc. Ên xuc obêc val ge od xam xovô ên xam nêbê buc wê susu ob vô nôn nivîha lec ge val. <sup>29</sup> Mêgem xam obêc wê susu wê a nêl vô xam ga obêc vô nôn lec ge od xam obêc xovô bêga bê buc wê a obêc lop mi lôm ge vô kwabo lec. <sup>30</sup> A nêl hixôn nôn vô xam bê xomxo wê dô gwêbaga ge obêc dô di kiyang wê a nêl ga vîhati obêc vô nôn lec vêl lê. <sup>31</sup> Lag

yuu kibun xôa obêc ma, di a kiyang ti xôa obêc ma hixôn lêm. Nge, vihati obêc yêp.

*Xomxo ti o xovô buc wê Yesu obêc vena lec ge lêm*

*(Matyu 24:36-44)*

<sup>32</sup> “Buc ti wê kiyang tige ob vô nôn lec ge, xomxo ti o xovô buc tige lêm, di angela wê dô lag puunê ge êno o xovô buc tige lêm, di Anutu nu a, a êno lungên, di Mag vaci tived wê xovô buc tige. <sup>33</sup> Om xam viac xam di bin buc wê Xomxo Nu ob vena lec ge, ên buc tige xam o xovô lêm.

<sup>34</sup> “Ge tîyi xocbê xomxo ti sea ben ên nêb ob la dô vigwe bangwe, om vông yuac wê i vông ge vac nue toto vigê ên nêb he i viac, di nêl vô xomxo ti wê mi viac vuayen ge nêb i dô di yaxên buc wê ob vena lec ge. <sup>35</sup> Mêgem xam êno, xam dô mi yaxên buc, ên xam o xovô buc wê xomxo levac tyo ob vena lec ge lêm, om mêd obêc vena vô bucên me vîvuaên mahigun, me wê kokilêx ob vô vya ge me vigwe vidiiên, ge xam lungên.

<sup>36</sup> Om xam dô mi yaxên, ên gec lêc xam diwêp di i vena lutibed. <sup>37</sup> Om kiyang ga, a nêl vô xam di a nêl vô xomxo vihati hixôn bêga ên a nêbê xam dô di yaxên buc tige.”

## 14

*Xomxo levac wê Yuda gee nêb ob hi Yesu i yib (Matyu 26:1-5; Luk 22:1-2; Jon 11:45-53)*

<sup>1</sup> Buc yuu obêc lam la vêl ge od xomxo Yuda ob myêl levac di ya blet xêkizêc wê yis maên ge ên nêb ob xovô buc Pasova. Mêd xomxo levac wê mi si daa gee hixôn xomxo wê xovô Moses

xolac gee, he myag môm wê nêb ob hôm Yesu xôn xôpacên di hi i yib ge. <sup>2</sup> Lêc he nêl ên he nêbê, “Il ob hôm i xôn lec buc levac Pasova lêm, ên xomxo obêc yê il nipaên di vông vevac vô il.”

*Vêx ti too mia nivivea lec Yesu bazub  
(Matyu 26:6-13; Jon 12:1-8)*

<sup>3</sup> Yesu la vîgwe Betani di la dô vac Saimon ben. Saimon ge wê kityax mahizihizi ya ninivi ilage, lêc gwêbaga vô nivaha lec. Mêd Yesu dô mi ya hixôn i, di vêx ti kô butol nivaha wê mia nivivea nivaha le vac ge ti mi lam vô i. Mia tige mone levac. Mêd vêx tige tax butol mya di too mia nivivea tige lec Yesu bazub. <sup>4</sup> Lêc xomxo wê dô ge, he ya yê môm tige tiyiên ma di nêl voma ên nêbê, “Bêna lêc vêx tige too mia tige sea? <sup>5</sup> Mia tige tiyi wê il ob vông mi tibii i kisuu lec mone yul yon di il ob vông mone vô tibii wê nêl susu maên gee lê, lêc vêx tige too sea.” Om he

xêyaa vô nipaên di he kunac vêx tige. <sup>6</sup> Lêc Yesu nêl ên nêbê, “Bêna lêc xam vông viyin vô vêx tige? Xam vông i dô. Ên môm wê i vông vô a ge, nivaha. <sup>7</sup> Ên xomxo wê nêl susu maên gee ob dô hixôn xam luta, om xam obêc nêb vông môm nivaha vô he ge, od buc tibeac yêp tiyi wê xam ob vông ge. Lêc a ga, a ob dô hixôn xam buc dia lêm. <sup>8</sup> Vêx tige vông môm tiyi xocbê yêp vô i ge, ên a gên o xib lêm, lêc i lam lipac mia nivivea lec a, om tiyi xocbê viac a nignivi wê xomxo ob yev a vac lôva ge. <sup>9</sup> A nêl hixôn nôl vô xam bêga bê vac vîgwe vîhati wê xomxo ob la nêl xolac vac ge, xomxo ob nêl vêx tiga kitong hixôn, om xomxo vîhati ob xovô môm nivaha wê i vông ge.”

*Judas nêb ob vông Yesu vac xomxo levac vigê  
(Matyu 26:14-16; Luk 22:3-6)*

<sup>10</sup> Judas Iskaliot ge Yesu nu ngivihi ti, lêc la vô xomxo levac wê mi si daa gee, ên nêb ob vông Yesu i loc vac he vigê. <sup>11</sup> Mêd he ngô kiyang wê Judas nêl ge di nilô vô nivihã, om he hilu kiyang xôn nêb ob vông mone ya vô Judas. Mêd Judas myag môp wê ob vông Yesu vac he vigê ge.

*Yesu ya bwoc sipsip hixôn nue ngivihi  
(Matyu 26:17-25; Luk 22:7-14,21-23; Jon 13:21-30)*

<sup>12</sup> Buc wê xomxo Yuda ob ya blet wê yis maên ge val, om buc taxlee ge wê he ob hi bwoc sipsip mi ya ên xovô buc Pasova ge, om Yesu nue ngivihi kinêg vô i ên nêbê, “Xe ob la viac xumac nilô tina wê il ob xa yaên vac lec buc Pasova ge?” <sup>13</sup> Om Yesu vông nue ngivihi yuu la di nêl vô yuu ên nêbê, “Muu loc vac vigwe Jelusalem, di muu obêc mîla vô xomxo vux ti wê kilê mia vac dêg ge, od muu loc vô i vixa, <sup>14</sup> di obêc la vac xumac lôma ge od muu nêl vô xomxo ti wê i xumac ge bêga bê, ‘Xolac kehe nêb xii lam kinêg vô ông bê xumac nilô tina wê i hixôn nue ngivihi ob ya yaên vac lec buc Pasova ge?’ <sup>15</sup> Muu obêc kinêg bêge vô i ge od obêc hilung xumac nilô levac ti wê yêp kisii ge vô muu, di susu wê il ob xa lec di dô lec ge le vac xumac tige pyap, om muu viac yaên wê il ob xa ge vac xumac nilô tige.” <sup>16</sup> Yesu nêl bêge vô yuu om yuu loc mi la Jelusalem, di mîla yê tiyi xochê Yesu nêl ge, mêgem yuu la viac yaên wê he ob ya ge.

<sup>17</sup> Hiyôv hoo la di vigwe ob buc, om Yesu hixôn nue ngivihî vigê yuu di tô mi la yuu mîla, <sup>18</sup> mêd he la dô mi ya, léc Yesu nêl ên nêbê, “A nêl hixôn nô n vò xam bêga bê xam wê il xa yaên hixônma ge ti obêc nêl a kitong vò xomxo levac levac.” <sup>19</sup> Kiyang tige vông he nîlô vò viyin om he toto kinêg lax vò Yesu ên nêbê, “Mêd a yuubê, me?” <sup>20</sup> Mêd Yesu nêl vò he ên nêbê, “Xam vigê yuu di tô mi la yuu ge, ti obêc nêl a kitong. Ge xomxo ti wê xii xôn vigêm ob la vac dipac nîlô ge. <sup>21</sup> Vixôhilôg, Xomxo Nu ob yib tiyi xochê xolac nêl ilage, léc xomxo ti wê ob vông Xomxo Nu la vac tibii vigê ge, obêc kô myaviwen nipaên lec timuên. Om xomxo tige yubacên obêc ma ilage ge od obêc nivîha.”

*Yesu vông pasa vò nue ngivihî*

*(Matyu 26:26-30; Luk 22:15-20; 1 Kolin 11:23-25)*

<sup>22</sup> He diya, dêc Yesu hêm blet ti di kitaa lec mêd hibû di vông vò he di nêl ên nêbê, “Hôm mi wa. Ga a nignivî.” <sup>23</sup> Nang dêc hêm kap wê wain le vac ge di kitaa lec mêd vông vò he di he toto num vac. <sup>24</sup> Mêd Yesu nêl vò he ên nêbê, “Ga a hî wê a ob kîpyax sea ên a nêb i ngîdu xomxo tîbeac xôn, om ob vông kiyang wê Anutu hîlu pyap ge i vò nô n lec. <sup>25</sup> A nêl hixôn nô n vò xam bê a obêc num mia wain i tii vac nang lêm di i loc tyip vò buc wê a ob num wain paha vac Anutu ben ge.”

<sup>26</sup> He vông lîlo ti pyap di loc mî la lec kitôn Oliv.

*Yesu nêl ên nêb Pita obêc yax i vun*

*(Matyu 26:31-35; Luk 22:31-34; Jon 13:36-38)*

<sup>27</sup> Yesu nêl vô he ên nêbê, “Xam vihati nilôm obêc vô viyin di xam ob sea a, i tiyi xocbê kiyang wê yêp vac xolac bêga nêbê, ‘A ob hi xomxo ti wê viac bwoc sipsip ge, om sipsip vihati obêc pec di moo sea.’ <sup>28</sup> Xolac nêl bêge, di a nêl vô xam bêga bê a obêc kidi lec magviha di mug la Galili di xam obêc timu.” <sup>29</sup> Mêd Pita nêl vô Yesu ên nêbê, “Xomxo vihati obêc nêb sea ông ge od he ob sea, di a mô ge, a ob sea ông lêm.” <sup>30</sup> Lêc Yesu nêl vô i ên nêbê, “A nêl hixôn nô n vô ông bê vô bucên tiga kokilêx obêc hi vya lu yuu lêm di ông obêc yax a vun lu yon.” <sup>31</sup> Lêc Pita luu Yesu vya di nêl kiyang xêkizêc lax vô ên nêbê, “Ma vêl. A ob yax ông vun lêm. Di tibii obêc hi a xib hixôn ông ge od pyap, lêc a ob yax ông vun lêm.” Di nue ngivihî vihati nêl tiyi xocbê Pita nêl ge.

*Yesu la kitaa gê Getsemani*  
(Matyu 26:36-46; Luk 22:39-46)

<sup>32</sup> Yesu he nue ngivihî loc mi la vigwe ti lê nêbê Getsemani, mêd Yesu nêl vô nue ên nêbê, “Xam dô ga ên a ob la kitaa.” <sup>33</sup> Om Yesu kô Pita yuu Jems hixôn Jon di he la, lêc Yesu nilô vô viyin mabu, <sup>34</sup> om nêl vô yon ên nêbê, “A nilôg vô viyin levac tiyi xocbê a ob xib ge. Om mon dô di wê môp xôn di le i yêp lêm.” <sup>35</sup> Mêd Yesu la teva tya di la kipôm manôn vac kibun di kitaa ên nêb obêc tiyi ge od viyin tige i o lêc tulec i lêm. <sup>36</sup> Om kitaa bêga nêbê, “O mag, ông tiyi wê ông ob vông môp vihati ge, om a nêb ông vô viyin tige vêl ên a, lêc ông o lêc vông i tiyi wê a nêb ông vông ge lêm. Nge, ông vông i tiyi xovôên wê ông vông ge.”



<sup>37</sup> Pyap di Yesu lax mi la vô nue ngivihî yon, lêc yê wê yon yêp nilô ma ge om nêl vô Pita ên nêbê, “Saimon, bêna lêc ông wêpê? Ông o tiyi wê ông ob dô mamviha tya lê ge, me? <sup>38</sup> Om mon kidi lec mi kitaa, êdêc susu nipaên i o lêc yaxên mon lêm. Ên nilôm nêb ob vông yuac lê, lêc nimmivi vô viyin.”

<sup>39</sup> Mêd Yesu lax mi la nang di la kitaa tii vac, lêc kitaa tiyi xochê la kitaa lu ngwe tax ge. <sup>40</sup> Pyap di lax mi la vô yon tii vac, lêc yê wê yon manôn yêp om yon yêp ge. Om Yesu tîpi vô yon lêc yon o xovô kiyang ti wê ob nêl vô Yesu ge lêm.

<sup>41</sup> Mêd Yesu la kitaa di vena lu ti wê vông yon ge, lêc yon yêp nilô ma om Yesu nêl vô yon ên nêbê, “Bêna lêc mon diwêp wêpênê? Ge pyap, ên buc wê xomxo ob vông Xomxo Nu la vac tibii nipaên vigê ge val vô kwabo lec. <sup>42</sup> Om mon kidi lec ên il ob la. Mon wê, xomxo ti wê ob vông a la vac tibii vigê ge val le ge.”

*Xomxo Yuda hôm Yesu xôn di Yesu nue ngivihî pec sea*

*(Matyu 26:47-56; Luk 22:47-53; Jon 18:3-12)*

<sup>43</sup> Yesu gên nêl kiyang tige di lutibed Judas wê nu ngivihî ti ge val. Di xomxo tibeac wê hôm yipac yuu vigo ge val hixôn. Xomxo tige, xomxo levac wê mi si daa gee hixôn xomxo wê xovô Moses xolac gee di Yuda levac levac ge, he vông he lam. <sup>44</sup> Judas nêl kiyang ti vô xomxo tige pyap ên nêbê, “Xomxo ti wê a obêc nga lia ge, od xam xovô bê ge xomxo tyo mê. Om xam hôm i xôn di wê i xôn di kô mi loc.”

<sup>45</sup> Mêd Judas val di la kwabo vô Yesu di nêl vô i ên nêbê, “Xolac kehe” mêd nga i lia. <sup>46</sup> Om xomxo tigeê yê di la hôm Yesu xôn.

<sup>47</sup> Mêd xomxo ti wê le kwabo ge hôm i yipac di sev xomxo daa siên nêl levac nu yuac ti ninya lihi vilu la vêl. <sup>48</sup> Mêd Yesu nêl vô xomxo wê hôm i xôn gee ên nêbê, “Xam xo ên xam nêbê a tibii yôdac ti om xam kilê yipac hixôn vigo di lam hôm a xônê? <sup>49</sup> Tiyi buc vihati a mi dô hixôn xam vac Anutu xumac ngibua di a mi nêl xolac vô xam, léc xam o hôm a xôn lêm. Om gwêbaga, kiyang wê yêp vac xolac ge ob vô nôn lec.” <sup>50</sup> Mêd Yesu nue ngivihî vihati sea i di pec mi la.

<sup>51</sup> Xomxo ngivihî ti wê duc nivimihî yêp yaên kwem ti ge mila vô Yesu vixa, om tibii nêb ob hôm i xôn, <sup>52</sup> léc ngivihî tyo pec mi la, di nivimihî tô mi yêp di i pec mi la xêtuac.

*Yesu la le vô xomxo levac manôn  
(Matyu 26:57-68; Luk 22:54-55,63-71; Jon 18:13-14,19-24)*

<sup>53</sup> Mêd he didii Yesu mi la vô xomxo ti wê tu xomxo daa siên nêl levac ge, mêd xomxo levac wê mi si daa gee hixôn xomxo wê xovô Moses xolac gee di xomxo levac levac gee, he vihati kitucma mi lam. <sup>54</sup> Mêd Pita timu vô Yesu vixa mi la, léc le lam teva tya om mila vô xomxo daa siên nêl levac ben wetôv di mila nyuu ngwax hixôn xêhipue.

<sup>55</sup> Mêd xomxo levac wê mi si daa gee hixôn xomxo kaunsil vihati kitucma mi dô, mêd he keac xomxo ya lam ên nêb he i lam nêl kiyang wê Yesu mi vông vô he ge kitong, ên he nêb he

ob tulec kiyang soên wê Yesu mi nêl ge ên hi i yib lec. Lêc he o tulec kiyang ti lêm, <sup>56</sup> ên xomxo tibeac vô nilô vô Yesu, lêc he nêl kiyang kityooên di kiyang wê he vông ge o tiyima lêm. <sup>57</sup> Om he ya le kisii di nêl kiyang kityooên bêga lec Yesu ên nêbê, <sup>58</sup> “Xe ngô wê xomxo tige nêl ên nêbê, ‘A ob dii xumac ngibua ti wê xomxo lox ya vigê ge vêl, di buc yon obêc lam la vêl ge od a ob lox vac, lêc a vigêg ob lox lêm.’ ” <sup>59</sup> Lêc xomxo wê nêl kiyang tige, vihati o nêl kiyang tiyima lêm.

<sup>60</sup> Mêd xomxo daa siên nêl levac tige kidi mi la le vac he mahigun di kinêg vô Yesu ên nêbê, “Xomxo nêl kiyang nipaên lec ông, om ông ob nêl kiyang ti lax vô he, me?” <sup>61</sup> Lêc Yesu le mya pilihi di o nêl

kiyang ti lax vô he lêm. Om xomxo levac tige kinêg vô i tii vac ên nêbê, “Anutu wê il mi pimil ge, ông Kilisi wê i nu ge, me?” <sup>62</sup> Om Yesu nêl ên nêbê, “A Kilisi, Anutu nu. Di xam ob wê a Xomxo Nu, a ob la dô vô Anutu, xêkizêc kehe, vigê hiyôv, di a ob vena vac viyobtoc kisii ganê.”

<sup>63</sup> Mêd xomxo levac tige nilô vô nipaên om lêx ici va ngakwi di nêl ên nêbê, “Om il ob keac xomxo ya mi he i lam nêl kiyang hixôn i tii vac lêm.

<sup>64</sup> Ên ici va so vya vô Anutu mi xam ngô pyap. Om xam nêb il vông bêna vô i?” Mêd he vihati nêl ên nêbê, “Yesu vông nipaên om il ob hi i yib.”

<sup>65</sup> Mêd xomxo ya pisuv myaluc lec Yesu mêd viyum i manôn xôn ya nivimihi di hi i di nêl vô ên nêbê, “Nêl xomxo ti wê hi ông ge lê kitong.” Mêd xêhipu wê viac Anutu xumac ngibua ge kô i mi la di la hi ya vigê.

*Pita yax Yesu vun*  
(*Matyu 26:69-75; Luk 22:56-62; Jon 18:15-18,25-27*)

<sup>66</sup> Pita gên le kibun lec wetôv mêd vêx ti wê vông yuac vô xomxo daa siên nêl levac ge val, <sup>67</sup> lêc yê wê Pita dinyuu ngwax mi dô ge om yê i manôn di nêl vô i ên nêbê, “Ông ge wê ông mi dô hixôn Yesu Nasalet ge.” <sup>68</sup> Lêc Pita nêl ên nêbê, “A lungên, di a o xovô kiyang wê ông nêl ge lêm.” Mêd Pita titêc vêl ên he mi la le vô vuayen ninya [di kokilêx hi vya taxlee.] <sup>69</sup> Mêd vêx yuac tige yê Pita tii vac nang om nêl vô xomxo wê dô kwabo ge ên nêbê, “Xomxo tige wê mi dô hixôn Yesu he nue.” <sup>70</sup> Lêc Pita yax Yesu vun nang di nêb i lungên.

Mêd he dô myabo tya nang mêd xomxo wê dô ge nêl vô Pita ên nêbê, “Vixôhilôg, xe xovô ên xe nêbê ông ge Yesu nu ngivihi ti, ên ông ge xomxo Galili ti.” <sup>71</sup> Lêc Pita nêl kiyang xêkizêc ên nêbê, “A le vô Anutu manôn di a nêl hixôn nôn bêga bê a o xovô xomxo ti wê xam nêl ge lêm.” <sup>72</sup> Mêd lutibed kokilêx hi vya tii vac nang. Om Pita xovô kiyang wê Yesu nêl vô i bêga nêbê, “Kokilêx obêc vô vya lu yuu lêm di ông obêc yax a vun lu yon.” Pita xovô kiyang tige om byag levac.

## 15

*Yesu la le vô gavman levac Pailat manôn*  
(*Matyu 27:1-2,11-14; Luk 23:1-5; Jon 18:28-38*)

<sup>1</sup> Vô pitoc yang xomxo levac wê mi si daa gee di xomxo wê xovô Moses xolac gee di Yuda levac levac hixôn kaunsil baba, he xôn kitucma di keac

lec kiyang pyap mêd ku Yesu xôn di kô i mi la vô hizap levac Pailat. <sup>2</sup> Mêd Pailat kinêg vô i ên nêbê, “Ông ge king wê Yuda vông ge, me?” Lêc Yesu nêl vô i ên nêbê, “Ông nêl i tiyi.” <sup>3</sup> Mêd xomxo levac wê mi si daa gee, he so vya tibeac lec Yesu, <sup>4</sup> om Pailat kinêg vô Yesu ên nêbê, “Ông tiyi wê ông ob nêl kiyang ti lax vô he ge, me? Ngô lê. He nêl kiyang tibeac lec ông.” <sup>5</sup> Lêc Yesu o nêl kiyang ti lax vô i lêm, om Pailat yetac di xo kiyang tibeac.

*Pailat tyuc lec nêb he i hi Yesu lec xax*

*(Matyu 27:15-26; Luk 23:13-25; Jon 18:39-19:16)*

<sup>6</sup> Mốp wê Pailat mi vông ge yêp bêga nêbê buc wê xomxo Yuda ob myêl vizid Pasova ge od he mi nêl xomxo wê dô vac kalabuhu ge ti lê vô Pailat di Pailat piwelac i di vông i lam vô he. <sup>7</sup> Vô buc tige xomxo ti lê nêbê Balabas dô vac xumac kalabuhu. Balabas hixôn xomxo ya, he vông vevac vô gavman Lom di hi xomxo ya yib om tibii vông he la dô vac kalabuhu. <sup>8</sup> Mêd xomxo Yuda tibeac la vô Pailat di nêl vô Pailat nêb i piwelac xomxo ti vêl i tiyi xochê mốp wê Pailat mi vông ilage. <sup>9</sup> Om Pailat kinêg vô he ên nêbê, “Om xam nêb a piwelac xomxo ti wê xam Yuda nêl king ge, me?” <sup>10</sup> Pailat nêl bêge, ên xovô nêbê xomxo levac wê mi si daa gee vaci vông Yesu lam vô i ên wê he xêyaa vô myavinê vô Yesu ge. <sup>11</sup> Lêc xomxo levac wê mi si daa gee nêl kiyang tibeac vô xomxo Yuda ên nêb he i nêl vô Pailat bê i piwelac Balabas vêl. Om he nêl bêge vô Pailat. <sup>12</sup> Om Pailat kinêg vô he nang ên

nêbê, “Om xomxo ti wê xam nêl lê nêbê Yuda nêl king ge, a ob vông bêna vô i?” <sup>13</sup> Mêd he tyuc vya levac la vô Pailat ên nêbê, “Hi i lec xax pola.” <sup>14</sup> Lêc Pailat nêl vô he ên nêbê, “Om il ob hi i ên vatya? Xomxo tyo vông nipaên tina?” Lêc he tyuc vya levac tii vac vac ên nêbê, “Hi i lec xax.” <sup>15</sup> Pailat nêb ob vông he xêyaa vô nivaha, om piwelac Balabas lax vô he mêd kô Yesu mi la hi i ya yihi, pyap dêc vông i la vac tibii vevac vîgê ên nêb he i kô mi loc hi lec xax.

*Tibii vevac so vya vô Yesu  
(Matyu 27:27-31; Jon 19:2-3)*

<sup>16</sup> Mêd tibii vevac kô Yesu mi la vac gavman levac ben di keac lie vevac vihati lam. <sup>17</sup> Mêd he kô ngakwi hi tiyi xocbê king mi vinyum ge mi la vinyum lec Yesu dêc buu kipomac yin mi tung lec i bazub xocbê

kilung ge. <sup>18</sup> Mêd he pimil Yesu pisiv di nêl ên nêbê, “Ông king wê Yuda vông ge, ông dô nimvaha.” <sup>19</sup> Mêd he hi Yesu bazub ya duvac di pisuv myaluc lec di yev vixa kitu vô i tiyi xocbê pimil i pisiv ge. <sup>20</sup> He so vya vô i pyap, mêd kwax ngakwi hi tige vêl di vinyum ici va ngakwi lec i nang, mêd kô i mi la ên nêb ob la hi i lec xax.

*He hi Yesu lec xax pola  
(Matyu 27:32-44; Luk 23:26-43; Jon 19:17-27)*

<sup>21</sup> He kô Yesu mi la vô môp dêc he yê xomxo ti wê dilam ên nêb ob la vîgwe levac ge. Xomxo tyo lê nêbê Saimon wê Aleksanda yuu Lupas ma ge di i ben Sailini. Om he kidu i nêb i kilê xax pola wê he ob hi Yesu lec ge.

<sup>22</sup> Mêd he kô Yesu mi la vigwe ti lê nêbê Golgota. Lê tige kehe bêga nêbê bazub len.

<sup>23</sup> Mêd xomxo ya nêb ob vông mia wain wê he pilepac malasin hixôn ge vô Yesu ên i num, léc Yesu nêbê numên ob ma. <sup>24</sup> Mêd tibii vevac hi Yesu lec xax pola, mêd he nêb he ob titang Yesu ngakwi vôma om he tide mi yê dêc titang i tiyi.

<sup>25</sup> He hi Yesu lec xax vô pitoc, tiyi xocbê hiyôv manôn 9. <sup>26</sup> Mêd kiyang wê ob nêl xomxo nêl nipaên kitong ge, he kivuu i yêp kisii om kiyang wê he kivuu lec Yesu ge, he kivuu bêga nêbê, "XOMXO TIGA, KING WÊ HE YUDA VÔNG GE."

<sup>27</sup> Mêd he hi tibii wê mi vun xomxo susu ge yuu lec xax hixôn Yesu, om ngwe yux lec xax vô Yesu vigê vilu hiyôv di ngwe yux vô vigê kêd.

<sup>28</sup> [Om kiyang wê plopet kivuu ilage vô nôn lec. Kiyang yêp bêga nêbê, "He nêl i lê hixôn xomxo nipaên."]

<sup>29</sup> Mêd xomxo wê lam la ge tipi nîba vô Yesu di so vya vô bêga nêbê, "Ông tige wê ông nêb ông ob dii Anutu xumac ngibua vêl di lox vac i tiyi buc yon mê? <sup>30</sup> Om ông ngidu ôcông va xôn di lop vêl ên xax." <sup>31</sup> Mêd xomxo levac wê mi si daa gee ya hixôn xomxo wê xovô Moses xolac gee he êno so vya vô Yesu di nêl vôma ên nêbê, "Xomxo tige ngidu xomxo ya xôn, léc o tiyi wê ob ngidu ici va xôn ge lêm. <sup>32</sup> Om xomxo ti wê nêbê i Kîlisi wê Islel vông king ge, i lop vêl ên xax ên il xê di vông i vin." Mêd tibii yuu wê diyux hixôn Yesu ge, yuu êno nêl kiyang nipaên lec Yesu hixôn.

*Yesu yib*

*(Matyu 27:45-56; Luk 23:44-49; Jon 19:28-30)*

<sup>33</sup> Hiyôv yev kitôn pux mêd vigwe ge vihati vô mapitoc ta di i la vô hiyôv manôn yon wê hucên ge. <sup>34</sup> Mêd hiyôv manôn yon ge, Yesu tyuc vya levac ên nêbê, “Eloi, eloi, lama sabaktani?” Kiyang tige kehe bêga nêbê, “Mag Anutu, mag Anutu, bêna lêc ông sea a?” <sup>35</sup> Mêd xomxo wê le kwabo vô Yesu ge ngô kiyang wê i nêl ge, om he ya nêl ên nêbê, “Ngô lê, tige kiyang vya lec Ilaija.” <sup>36</sup> Mêd xomxo ti tup mi la kô mia myamîlumac di tinyum vac mia kilin di kilax vac ngising di hôm la kisii vô Yesu mya nêb i tep, di nêl ên nêbê, “Om il ob dô mi yaxên bêc Ilaija obêc val vông i lop vêl ên xax, me?” <sup>37</sup> Mêd Yesu tyuc vya levac di yib.

<sup>38</sup> Mêd nivimihi levac ti wê yux vac Anutu xumac ngibua ge lêx vac kisii di lam tô vô myahîpu. <sup>39</sup> Mêd tibii levac ti wê viac tibii vevac vihati ge le vô Yesu manôn di yê wê yib ge om nêl ên nêbê, “Vixôhîlôg, xomxo tige Anutu nu.”

<sup>40</sup> Di vêx ya le teva lêc yê ma la Yesu. Vêx tige, Malia wê ben Makdala ge hixôn Malia wê Jems timuên yuu Josis ta ge, di Salomi. <sup>41</sup> Vô buc wê Yesu dô Galili ge od vêx tige mi timu vô i vîxa di viac i ya yaên. Di buc wê Yesu la Jêusalem ge, vêx tibeac ya la hixôn om he xôn dô mi yê wê Yesu yib ge.

*He lii Yesu vac lôva*

*(Matyu 27:57-61; Luk 23:50-55; Jon 19:38-42)*

<sup>42</sup> Buc tige, buc wê he Yuda ob viac he ge, ên titige obêc buc sabat. Mêd vigwe huc, <sup>43</sup> om Josep wê ben Alimatia ge la vô Pailat. Josep ge kaunsil ti om mi dô vac kitucmaên hixôn Yuda



levac levac di xomxo yê i nêb i xomxo nivihã ti. Josep dô bin buc wê Anutu nu ob lam tu king gê kibun ga. Mêd Josep xonaên ma di loc mi la vô Pailat di la kitaa i ên nêb i vông Yesu ninivi vô i ên i ob la lii vac lôva. <sup>44</sup> Mêd Pailat yetac ên wê Josep nêl nêbê Yesu yib ge om keac tibii vevac levac tige lam di kinêg vô i ên nêbê, “Yesu yib gwêba, me?” <sup>45</sup> Mêd tibii levac tyo nêl ên nêbê, “Yesu yib gwêba.” Om Pailat tyuc lec nêb Josep i kô Yesu ninivi mi loc lii vac lôva. <sup>46</sup> Mêd Josep la kisuu nivimihi kwem ti mêd la kwax Yesu vêl ên xax di vium vac nivimihi tige di kô mi la lii vac lôva wê he kiden vac ngidax ge ti. Pyap dêc vixog ngidax levac ti la le vac lôva mya xôn. <sup>47</sup> Mêd Malia wê ben Makdala ge hixôn Malia wê Josis ta ge, yuu la hixôn om yê vigwe wê Josep la lii Yesu yêp vac ge.

## 16

*Yesu kidi lec vac yibên*

*(Matyu 28:1-8; Luk 24:1-12; Jon 20:1-10)*

<sup>1</sup> Buc sabat la vêl mêd Malia wê ben Makdala ge hixôn Malia wê Jems ta ge di Salomi, yon kisuu wel hixôn susu nivivea ya ên nêb ob la lipac lec Yesu ninivi. <sup>2</sup> Mêd da pitoc yang ge yon kidi mi la, ên nêb ob la vac lôva. <sup>3</sup> Lêc yon kinêg voma ên nêbê, “Letya obêc vixog ngidax vêl ên lôva mya ên xonê?” <sup>4</sup> Yon nêl bêge ên wê ngidax tige mabu yocên ge. Mêd yon yê ma la lêc yê wê ngidax vixog mi la vêl ên lôva mya ge. <sup>5</sup> Om yon la vac lôva nilô lêc yê xomxo ngivihã ti wê vinyum ngakwi

kwem dia ge dô vô yon vigê hiyôv, om yon yetac mabu. <sup>6</sup>Lêc xomxo tyo nêl vô yon ên nêbê, “Mon yetacên i ma. Ên mon myag Yesu Nasalet ti wê tibii hi lec xax ge. Lêc o dô ga lêm, ên kidi lec maviha vac yibên. Mon wê vigwe wê yêp lec ga pileva. <sup>7</sup>Om mon lôc, di lôc nêl vô Pita hixôn Yesu nue ngivihi baba ge bêga bê Yesu ob mug la Galili di xam obêc mîla wê i gê Galili tiyi xocbê nêl vô xam ilage.”

<sup>8</sup>Mêd vêx yon ngô kiyang wê i nêl ge di yon kinu la di yon yetac, om yon lop mi la vixun di pec mi la, di yon o nêl kiyang kitong vô xomxo ti lêm, ên yon xona mabu.

*Malia wê ben Makdala ge yê Yesu  
(Matyu 28:9-10; Jon 20:11-18)*

<sup>9</sup>[Da pitoc yang ge wê Yesu kidi lec vac yibên ge od hîlung i vô Malia wê ben Makdala ge taxlee. Malia ge wê Yesu tii vimwo nipaên vigê vilu di sec yuu vêl ên i ilage. <sup>10</sup>Om Malia la vô xomxo wê mi dô hixôn Yesu ilage ên nêb ob nêl kiyang tige kitong vô he. He dô hixôn nilô viyin di byag mi dô, <sup>11</sup>lêc Malia la nêl vô he ên nêbê, “Yesu kidi lec vac yibên om hîlung i vô a mi a xê i.” He ngô kiyang tige lê, lêc he o vông i vin lêm.

*Yesu mîla vô nue ngivihi yuu vac môp  
(Luk 24:13-35)*

<sup>12</sup>Nang dêc Yesu nue ngivihi yuu sea Jerusalem di la vô môp, lêc Yesu ninivi pilepac bangwe di i val vô yuu. <sup>13</sup>Om yuu lax mi la nêl kitong vô nue ngivihi baba, lêc he o vông i vin kiyang wê yuu nêl ge lêm.

*Yesu vông yuac sinale vô nue ngivihi  
(Matyu 28:16-20; Luk 24:36-49; Jon 20:19-23)*

<sup>14</sup> Nang dêc Yesu nue ngivihi vîgê yuu di ti tô mi la ge dô di ya yaên, lêc Yesu mîla vô he mêd nêl kiyang xêkizêc vô he ên wê he nîlô xêkizêc di he o vông i vin lêm ge, ên xomxo wê yê Yesu vô buc wê kidi lec maviha ge nêl kitong vô he lê, lêc he o vông i vin lêm. <sup>15</sup> Mêd Yesu nêl vô he ên nêbê, “Xam loc vac vîgwe vîhati di loc nêl xolac vô xomxo vîhati yang. <sup>16</sup> Di xomxo ti obêc vông i vin di lipac mia ge od Anutu obêc kitya i nêl nipaên vêl di ob dô maviha luta. Lêc xomxo ti obêc vông i vin lêm ge od ob tulec myaviwen nipaên wê ob kitya i vêl ge. <sup>17</sup> Om xomxo wê vông i vin ge ob vông do levac hixôn bêga bê he ob nêl a lêg di tii vimwo nipaên vêl, di he ob keac xomxo ba vya, <sup>18</sup> di he obêc hôm myel nipaên me he ob num mia kilin wê ob hi xomxo yib ge od susu tigege ob vông he vô nipaên lêm, di he obêc vyax vîgê lec xomxo yidac ge od yidac ob tip la.”

*Yesu lec mi lax vô ma Anutu  
(Luk 24:50-53; Sinale 1:9-11)*

<sup>19</sup> Apumtau Yesu nêl kiyang vô nue ngivihi pyap, dêc Anutu kô i mi la lag puunê di i la dô vô ma Anutu vîgê hîyôv. <sup>20</sup> Mêd nue ngivihi loc mi la nêl xolac vac vîgwe vîhati, di Apumtau ngidu he xôn om he vông do tîbeac vîyang vîyang, om do wê he mi vông ge nêl kitong nêbê he nêl kiyang nôl.]

**Yesu Xolac**  
**The New Testament in the Patep Language of Papua**  
**New Guinea**  
**Nupela Testamen long tokples Patep long Niugini**  
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

---

PDF generated using Haiola and XeLaTeX on 22 Feb 2024 from source files dated 31 Aug 2023

3d2c844d-4bc8-590b-bbf2-3a5fcd1f7ad8